

# **SONAJING**

(KA·SAAN' GIT)

By

*B. S. Bangshall*



# SONAJING

(KA·SAAN' GIT)



By

*B. S. Bangshall*

*Published by*  
**Mrs. Sunilla G. Momin**  
Bonepa A·tilla, Tura

First Edition - 2010  
3,000 Copies

**Copyrights Reserved**

**Rs. 80.00**

*Printed at :*  
**Eeu Dee Printers**  
**Nakam Bazar, Tura**  
**West Garo Hills, Meghalaya**

## AGANSOANI

“Sonajing” ki·tapni Bak I, Bak II aro Bak III gimikkon anga git gitasa ku·marapo done seaha, aro uni mangsongani ba ortoara A·chikrang skang intalan katta ring·na aro sul salna changgiparang ong·ani gimin ong·a. Uamang ringo·cha·o, wano·an·sengao, doroa·ajeao, krita·amuao aro grapa·mangtatao katta ring·e, sul sale ba katta dokesa an·senga, mania aro ma·ringa. ‘Gonda’- dokani, ‘harara’-ring·ani, ‘direng’-dokani, ‘nanggorere’ aro ‘serejing’-ring·ani, ‘him·angai’ aro ‘aiao·aiao’ ring·anirang A·chik sul mancharang ong·a uni gimin “Sonajing”-ko ua pilak sulrangna ma·keesa anga seaha. Ua A·chik sulranga an·sengani, ma·ringani aro sinteani sulrang ong·oba maikai ku·marap katta·rikanina gimikan apsan ma·gapa uan A·chik gisikoni nabaani aiao inmangipa man·batelaiani ong·a ine nikna man·a.

Git ring·na ba sena changgipa sappiparanga ba gitna gisik nangchongmotgiparanga mamung gipinrangna chanchiani dongna man·rongbreja. A·chikrangni gro·jea, melaa·mangdonga aro agan me·aparango sul salanirang dongjaoba katta·jikseko jakkale ma·rap·ma·rap, ripa·ripa, sram·sram agananiranga niam, bewal aro gisik gnanganirangko ku·prete gisiko nangatani ong·a. A·chik pagitchamrang indakesa songko·nokko dila aro niamni bewalo rakkia.

Da·ororo manderangni gisik gadangrang chasongrikrik chuangoba namani, maniani aro nambate janggi tangani gadangde pagitchamrangni gadangko rikna man·jawaha. Indiba changsao A·chik jatni namgipa janggi tangani gadang dongachim ine gisik ra·e uko ronggrike rakkie donpana man·a.



# SONAJING

(Ka·saan' Git)

## BAK – I

(Iano jakkalgipa bimungrang bimung mingtinggrik  
giparangko mangsongja)

A·chik 'songni mingsinga  
Gittim jela sotbonga,  
Rona biap an·senga  
Aganrikna songdonga.

Rikrak·dandak man·jaoba  
Songo cha·a·sipaja,  
Nokking koripbokjaoba  
A·jak re·a dongpaja.

A·bri a·chu simdimdim,  
Songni salgro salgipeng,  
Atam pringo ka·sinjrim –  
Balnanggipa songan·seng.

Songni ka·ma a·kongchi  
Chiring dare sappori,  
C'hibimaba nalsachi  
Jokangenga ta·srisri.

Rama daka ta·dingding  
Songni sara jatchiko,  
Gittim damsa a·biding  
A·bri patal kosako.

Nokking sone kepachek,  
Pangsu agal am·pangchi –  
Ja·gra done rikachek  
Bolsal kirorarachi.

Songadamni kosakchi  
Panterangni nokpante –  
Jang·ki teng·a kolatchi  
Rona nama niwate.

Songnok-bari bolgrimgrim  
Nina mikkim chabea,  
Sara rona salakkim  
Balsri balsri nambea

Attam jajong teng·ao  
Jikjak-jikjak roronga –  
Nokpanteni sarao  
Pante sue-goronga.

Sara saatal siridim,  
Sara on·tinggrikao,  
Nomil jinma warekdim  
Mi-su·ronga attamo.

Song-nap song-gabatgipa  
Salsa saldongna gitik,  
Chatchi ang' bak sangipa  
Songdongcepanagitik.

Songde songsarekoba  
Sara nokkra chijengjeng,  
Leka-poraitokjaoba  
Nama songsul nokripeng.

Leka-pora man·paja  
Da·ning mande gitchamrang;  
Poraitoka indiba  
Chasong gital damberang.

Song-nok gittimjelana  
Gisik an·saotokbea,  
Songo bi·sa bang·ana,  
Donjok songni skulkoba.



Ua songni manderang  
Gisik wa·satokbea,  
Atchu·ambi gitchamrang  
A·chik katta man·bea.

Songni nokma me·apa –  
Doro·ring·na changgipa,  
Katta aganrakgipa  
Songtangna gro·jegipa.

Uan Sonajing·ni song  
Balsri Gittim minggipa;  
Badia'·a A·chik song  
Song·nok an·sengbegipa

Nikgen tol·a gitasa  
Saoba nikpakujaode,  
Atchiramtang gitasa  
Ka·pak·ka·pak nikode.

\*\*\*      \*\*\*      \*\*\*

Salni demechik gita  
Nika Sonajingkode,  
Do·do do·rimit gita  
Ching·a da·nang nomilde.

Chame inpana gitik  
Mikkang sona chijimjim,  
Niko ja·rikna gitik  
Te·rokbalbal dimrimrim.

Wagam kitma bitchiri,  
Wachek·wachek se·ending,  
Pekuari boksari  
Ku·ba gisok similding.

Ku·chimitenga gita  
Ku·sim ku·sim ku·bibal  
Mandal bibala gita  
Ku·chilrangba gitchakbal.

Okgil te·mina gita  
An·gil ching·a rimitbal  
Ku·rang gaanti gita  
Ka·sirokrok rinokbal.

Nama nanggo nomilde  
Nie ropana gitik,  
Ching·a da·ning bi·sade  
Chame inpana gitik.

Dingtang daktea gita  
Jakma giticham kamalni,  
Katta agana gita  
A·chik pagitchamrangni.

Manden' mikkang nitoa  
Mikchi nikna man·gipa –  
Kam-gisikde indiba  
Ramram nikgijagipa.

Tona man·ja indiba  
Sonajing-ni gisikko;  
Mikkang nitoaniba  
Sokja gun-ginangako.

Indioba manderang  
Uko nikchongmotjaode, -  
Chanchidugagiparang  
Man·ja bebera·nade.

Ua apsan chasongo  
Chasong mingkinagipa –  
Songsul gitim damsao  
Donga saksa panteba.

Dingram Gitok inesa  
Minga ua gitimko,  
Pante Balseng inesa  
Bimung dona panteko.

Dingram Gitok chengoni  
Balsri Gittim nalsao,  
Sonajing-ni songoni  
Salpaksani ramao.

Pante bi·samitingo  
Balseng roangrongana  
Songgabate re·pako  
Sonajing-ni songona.

Balseng chonengmitingon  
Pagipara Balseng-ni  
Siangaha rakengon  
Ga·akenba boloni.

Seni-pani siana  
Ma·gipara Balseng-ni  
Gitim songchelachina  
Katjok ua songoni.

Danang uandakesa  
Songchelachi katangjok,  
Balseng maang ma·ningsa  
Nokaptangko watangjok.

Indakesa songchelao  
Songdongejok untaltal,  
U'mang' dongegipako  
Minga Boldam Songgital.

Uno dongmitingosa  
Pil·sa a·sel ong·taijok,  
Setangna kalimesa  
Balseng ma·ba siangjok.

Adigita bilsirang  
Salsagita batangjok,  
Pilak dukni a·selrang  
Ong·genoba bon·angjok.

Songgipino dongoba  
Songtangkode gualja;  
Gittim an·sengbeoba  
Atchiramkode sokja.

Pante Balseng gisikchi  
Uandake Chanchijok,  
Dingram Gitok songtangchi  
Ua re·angpiltaijok.

Songtangode indiba  
Uni ma·drang dongjajok;  
Ma·de ma·jong dongoba  
U'mang sie bon·tokjok.

Uni gimin chanchijok  
Ja·nengtakna songtango,  
Balseng dongnapepajok  
Songni saksa mandeo.

Songtangona sokangon  
Songo·noko jangsojok,  
Sonajingba songtangan  
Uko knasopajok.

Da·ning Balseng unode  
Dal·e pante sokaha,  
Uni bilsida·ode  
Bilsichi·chet ong·aha.

Balseng pante cheng·rengreng  
Pante do·mesal gita;  
Nama da·nang ro·rengreng  
Sakgitchak rita·rita.

Bilko jakko tonaba  
Dongja songni pantede,  
Gun·gisikko inoba  
Sokja uni chasongde.

Ramadilo nikwaton  
Change nisona gitik,  
Sara rona ong·katon  
Nomil ja·rikna gitik.

Indakgipa panteba –  
A·chik pante ma·ate, -  
Mikkim grijok indiba  
A·chik jato atchie.

Pante nitobeoba  
Ma·gri-pagri saksanjok;  
Mande gisik seng·oba  
Rasong kopal dongjajok.

Adigita salrangna  
Rojok ua songtango,  
Duk ong·oba an·tangna  
Ra·bitjajok gisiko.

Unomiting somoio  
Sam-bol ritimbamiting,  
A·ba bolgrim bario  
Bibal balgaobamiting.

A·ba bolgrim andalao  
Jingjingbengmung chenggari.  
Chiring ka·sin bolgrimo  
Do·o-matni gitari.

Burung bolgrim gimikon  
A·dingmiting somoisa:  
Songo·noko pilakan  
Katchan' gisikrarasa.

Indakmiting salrango  
An·sengbatjok batesa;  
An·senggipa gittimo  
Rona gitik gitiksa.

Attamgrochi barasa  
A·bri patal kosako,  
Balwa balsri balsrisa  
An·sengbata roramo.

A·ba rama siridim  
Songadamni kosakchi,  
Ua gitan ramachim  
Re·na Balsrigittimchi.

Pante Balseng gisiko  
Chanchipajok roamna,  
Robibal-ni atamo  
Saksan balwa ringpana.

Pante ong·katangpajok  
Sala jatchi onchoko,  
Balwa ringna re·angjok  
Songni a·ba ramako.

Pante ta·kreng rakgipa  
Kotip terokjang kaangjok,  
Ja·ana tongkranggipa  
Gananiko ganangjok.

Katongangjok ta·krengkreng,  
An·tang kang·karekoba;  
Nikarijok chengrengreng  
Pante seng·gipakoba.

Re·a ramasamniko  
Bibal akkimjolangjok,  
Balrimita balsako  
Nachiltango sepangjok.

Unochacha somoio  
Dikdik balwa ringpana  
Chanchipajok gisiko  
Sonajing-ba an·tangna.

Katchaan' gisik ritchengcheng,  
Attam an·seng balsrisri;  
Bi·sa·desa jo·jengjeng  
Samtangtangchin ka·srisri.

Donge donge nioba  
Noko dongsiksakaha,  
Songchelachi ong·jaoba  
A·bao rona sikaha.

Sonajingba indake  
Gisiktango chanchie,  
Ong·katangjok an·senge  
Saksan rona mangsonge.

Ba·ra tangsimbitbitko  
Name gane nipajok,  
Riking bangsi malako  
Kang·kareo ganangjok.

Be·entangko pindapna –  
Ka·bak okgil te·rokko,  
Ganangaha jangtongna  
Me·chik chola rimitko.

Songadamni ong·oba  
Natapsiko jakkalja,  
Kristian gittim ongjaoba  
Songsarekde ong·srangja.

Gitok simok-simoko  
Ganangaha ripokko,  
Warekdimdim ka·bako  
Ripok rikrak-rikrakko.

Bibal nama gipokko  
Kinitomo potangjok,  
Sko te·rokbalbalo  
Bibal balsa balangjok.

Unon Sonajing-ko de  
Salni nogipa gita,  
Nikataijok bikode  
Sona chingcheta gita.

Re·angaha indake  
Attam balwa ringpana –  
A·ba ramao niwate  
Gisik kusi ong·pana.

A·ba a·bri patalo  
Jimje-jimje roame,  
Nikwatatjok Balsengko  
Uchipakko niwate.

Ka·tong gisik bokbake  
Dāmben' an·saoanina,  
Dongnapjajok nikwate  
Sikjok sepang re·bana.

Sonajing-de indaken  
Chawatwate re·bajok,  
Sepangosa mai ka·gen  
Uko nikja dakaijok

Da·nang pante Balsengde  
Ropaengachim saksansa ·  
Rong-te namao asonge  
Bolko-wa·ko niesa.

Wa·jak samcheng gam·ana  
Pante niwilwalosa  
Deldik chadika gita  
Nikjok Sonajingkosa.

Indioba maika·gen –  
Uamang da·nang da·osa,  
Gronggrikataijok indaken  
Pante-me·tra sokosa.



Maina da·nang Balsengde  
Pante bi·samitingo --  
Sonajingchi re·ange  
Roangronga gisepo.

Uni gimin da·oba  
Uamang ui·grikenga,  
Nika arimahaoba  
Mikkang talgrikkuenga.

Indioba deldikdik,  
Nisingchakna pa·gija,  
Sonajingde rang·gitik  
Dongjok dake nirkija.

Sonajingde indaken  
Re·joljola dakangjok, -  
Indioba maika·gen  
Pante singe nirikjok.

Uamang da·nang indiba  
Ui·grikja dakchengjok,  
“Na·a baoni” inesa  
Singgrikchenga dakangjok.

Unikosa ku·nape  
Agangrike roangjok  
Ku·marapko ja·rike  
Iandake ring·angjok.

\*\*\*\*\*

*Balseng* :- Aiao, na·a sawasa –  
(*Ui·ja dake*) Ramasamni do·rimit,  
Re·mikmika bachisa  
Ringreng ringreng ku·chimit ?

*Sonajing* :- Pante na·a sawasa –  
(*Ui·ja dake*) Burungoni do·mesal  
Roamenga gitasa  
Ringrang ringrang mikasal ?

Bal : - Aiao, gisik do·bokba  
Dimik dimak jamanga,  
Maman' nokchi re·nara  
Badiasa ramara ?

Sona :- Baoni pante na·ade  
Balekamung seng·amung,  
Maina ring·a indake  
Nanggorere Serejing.

Bal :- An·tangkode donari  
Maina ina angkosa,  
An·tang gisiktangari  
Ku·rang salengakosa ?

Sona :- Seng·na andalsikmiting  
Chasong mikaokujaenga,  
Nanggorere Serejing  
Ring·arangko inenga.

Bal :- Seng·na jachanggiparang  
Jeba ine rochina –  
Gisik an·saogiparang  
Jatna rasong on·china.

Sona :- Jeba inbo indiba –  
Inrakgipa mandede,  
Mamung ong·ja ring·oba  
Gisik an·sengengode.

- Bal     :-     Atcho namjok indide,  
                   Jeja nang·ni gisikko –  
                   Aganpabo da·ode  
                   Ka·sapae ramako.
- Sona    :-     Na·a sawa a·gital  
                   Mikchrak sing·e roenga ?  
                   Baoni pante ro·rengbal  
                   Pa·ripjangjang bo·enga ?
- Bal     :-     Hao, bo·ja da·nang indiba  
                   Na·a jeba inaebo;  
                   Nomil te·rokbalbala  
                   Rama mesokatpabo.
- Sona    :-     Ilan rama re·angbo  
                   An·seng an·seng ku·chimit,  
                   Nang mamachi roebo  
                   Angan bini demechnik.
- Bal     :-     A·chik doe re·baani  
                   Ding·ol gramchienga,  
                   Sengnapgija na·ara  
                   Bachinasa re·enga ?
- Sona    :-     Gri, re·ja na·a re·ade  
                   An·tang gisiktangtangsas,  
                   A·ba ramao roame  
                   Nang·ko nikwatatesa.
- Bal     :-     Ta·ding jokna man·jaesa  
                   Chiring gongding jokama ?  
                   Nomil a·gitalaba  
                   Angko mikkang talama ?
- Sona    :-     Gongding gongdang jokoba  
                   Chiring bisik dilsasan,  
                   A·gital ‘ne inoba  
                   Nang·ni tol·e roasan.

- Bal     :-     Nang·ko bimung mingara  
                     Knasringa gitama ?  
                     Sing·teknaba dedara  
                     Sonajinga na·anma ?
- Sona    :-     Aiao, da·nang na·ade, -  
                     Jawa songni bi·sade –  
                     Man·atmaia dakake  
                     Ang' bimungko pantede.
- Bal     :-     Ra, indide na·aba  
                     Mingat ang' bimungkoba,  
                     Bimung knatojaoba  
                     Changsamang mang indiba.
- Sona    :-     Anga nang·ko mingnapja  
                     Mingo namjanawakon,  
                     Mingna ku·sik re·manja  
                     Kema ka·o namgenkon.
- Bal     :-     Hao, kinadika angade  
                     Nomil ajak ajakde,  
                     Inbingbangpanabene  
                     Nang·ma gita na·ade.
- Sona    :-     Me·chik bi·sa angade  
                     Kratcha·achi pakmara –  
                     Aiao, kema indide  
                     Pante Balseng na·ara.
- Bal     :-     Aiao, bebe, nanggo mo  
                     Katchi mite nikama ?  
                     Bimung nampagijako  
                     Mukosito ka·ama ?
- Sona    :-     Ka·sinjrimjrim balka·sin  
                     Attam balsri balenga,  
                     Nang·ni roangchengaonin  
                     Nang' bimungko man·aenga.

- Bal    :-    Balwa balsri balana  
                  Me·ga bijak mocnga,  
                  Angni roangchengoa  
                  Na·a da·nang chonaenga.
- Sona   :-    Riting riting bilronga  
                  Jinjok jinjok do·riting,  
                  Nang·ni roangchengoa  
                  Anga gana·kalmiting.
- Bal    :-    Jajong teng·rakkujaengmung  
                  Attam rona namkuja,  
                  Na·a chonmitingemung  
                  Nama dakna changkuja.
- Sona   :-    Bi·sa chonmitingoba  
                  Gisik ra·pakuenga,  
                  Nama dakna changjaoba  
                  Nang·ko gualkujaenga.
- Bal    :-    Nang·ni angko nikantal  
                  Maianasa gualja ?  
                  Namnikode sikangtal  
                  Maina uko parakja ?
- Sona   :-    Kini potna namkuja  
                  Bibal manchokaengmiting,  
                  Paraksrangna pa·kuja  
                  Anga da·nang chonmiting.
- Bal    -    Me·tra chonengkuode  
                  Maina kratcha dakmika ?  
                  Ramram niksoaiode  
                  Maina angko namnika ?
- Sona   :-    Bol kambeo gaaode  
                  Songdu sagal nikwata,  
                  Ang' chamesa na·ade  
                  Na·an pante silbata.

- Bal :- Jawa gipin nomilde  
                     Kratcha·mika dakmaia,  
                     Maisa angko na·ade  
                     ‘Chame’ inbingbangaia ?
- Sona :- Jawa songni pantede  
                     Pante seng·a dakaia,  
                     Da·nang gose na·ade  
                     Bikpil-pangpil inaiia.
- Bal :- Jeba ong·bo indiba  
                     Nang·ko anga jejawa,  
                     “Chame” inbingbangoba  
                     Jawa kinao namjawa.
- Sona :- Aganboching indide  
                     Maia nanggen panteko –  
                     Nangja mama-adade  
                     Nang·ko apan’ gritangko.
- Bal :- Chatchi ma·sigijako  
                     Nono·abi changenma ?  
                     Nang’ pan’ gritang jinmako  
                     Na·a chame ra·genma ?
- Sona :- Ke·a-nanga gimikko  
                     Ame-chame nangoba,  
                     Nang·ko saksamangmangko  
                     Chame ra·a indiba.
- Bal :- Bolsal ringsonggitalko  
                     Maina den·e kal·aka –  
                     Pante silpagijako  
                     Maina chame ra·naka ?
- Sona :- Pante do·mesal gita  
                     Mande nama jokona,  
                     Salni depante gita  
                     Gisik seng·a jokona.

- Bal :- Pante saksa nikjokon  
Me-chikrangde sengnapja,  
Mikcha-namnikaiaikon  
Pante rona on-gija.
- Sona : Maianasa pantede  
Pante mande salara -  
Rona am-a indide  
Babamangchi na-ara ?
- Bal :- Mama chane roesa  
Rona am-a nang' pachi,  
Balwa ringna inesa  
Nang' song Balsrigittimchi.
- Sona : Balsrigitim songosa  
Nang-na balwa namama ?  
Nang' mamani nokosa  
Nang-ni sara roram ma ?
- Bal :- Nina gitik gitiksa  
Bibal balsa balgital  
Nikon ka-sa-ka-sasa  
"Sona" na-ade rimitbal.
- Sona :- Aiao, da-nang na-aba  
Angko maina indina,  
Rimitbale nikoba  
Na-a gride magina.
- Bal :- Bolgrim burung dikoba  
Bibal balo nitoa,  
A-gilsako na-aba  
Indin ong-ja magina.
- Sona :- Nitoako mingode  
Mingna katta rakbea,  
Aganboching indide  
Maiko minga nitoa.

- Bal :- Aganode kan·dike –  
Darang pilak nitoa –  
Nama gunni ronggrike  
A·gilsakna teng·sua.
- Sona :- Bila sakni do·drangba  
Jora-jora manggini,  
Nitoani manchaba  
Donga rokom minggini.
- Bal :- Nitoani rokomsa  
Mingnamani teng·sua,  
Nikrangrani ning·osa  
Jringjrot kimkim dongnua.
- Sona :- Gipin donga rokomsa  
Nitoani a·sako  
Nikrangrani mangmangsa  
Mikbokatna gisikko.
- Bal :- Nitogipa bibalde  
Salsanasan balgaoa,  
Bale sikrepahaode  
Soruronge gimara
- Sona :- Similgipa bibalsa  
Gun ginanggipa gita,  
Bale sikrepahaoba  
Simila gun chiprika.
- Bal :- Gun-ginanga mandede  
Bimang rongdimeloba,  
Gun-gisikde nambate  
Rongchingkugen indiba.
- Sona :- Nitoani mangmangde  
Bijak dipila gita,  
Mande gun-ginangasa  
Ching·a aski gita.



- Bal :- Indioba na·ade  
                     Gun gisiksan dongaija,  
                     Kakket agansrangode  
                     Nitoachi komija.
- Sona :- Aiao, da·nang na·aba  
                     Maina nachil-akbea,  
                     Anga silpagijako  
                     Maina rasong dakbea.
- Bal :- Rasong daka ingenma  
                     Kakket chong·mot kattako,  
                     Saoba jena man·genma  
                     Nang·ni nitoaniko.
- Sona :- Mikchaa-namnikaiama  
                     An·gil ching·kalanasa ?  
                     Pante ka·sanapama  
                     Me·chik nitoanasa ?
- Bal :- Me·chik nitoanasan  
                     Ong·ja nang·na ka·saade,  
                     Gun gisikna mangmangsan  
                     Ka·sanapja nang·nade.
- Sona :- Aganpabo indide  
                     Ka·saani ortoko –  
                     Angna mangmang kan·dike  
                     Nang·ni ka·tong gisikko.
- Bal :- Ka·tong ka·saanide  
                     Ka·saani giminsa –  
                     Ka·saani ortode  
                     Orto salgisaknisa.
- Sona :- Oe, bebe, chong·mot mo  
                     Dongja a·gilsakode,  
                     Manden' rasong mikkimko  
                     Am·ja ka·saanide.

- Bal :- A·gilsakni ong·jasa  
Ka·saani gisikde,  
Gisik salgisaknisa  
Kakket ka·saanide.
- Sona :- Mitesakni gisikko  
Mande a·mang nangata:  
Ka·saani a·sako  
Pangnan ja·gitdotata.
- Bal :- Da·nang uni giminsa  
Kakket ka·sagrikani,  
Ong·rongakon dikdiksa  
Jokna a·gilsakoni.
- Sona :- Mikcha-namnikanisa  
Mikbokata gisikko,  
Ka·saani dikdiksa  
Da·nang manden' ka·tongo.
- Bal :- Aiao, na·ade nomilde  
Me·chik gisikarisa,  
Ka·tong gimik suake  
Ka·san' gisikrarasa.
- Sona :- Me·chik mande ong·eba  
Kakket ka·saa dongjaode,  
Manden' mikkang siloba  
Maginasa me·chikde.
- Bal :- Mikkang bimang mangmanga  
Mesokani jojrangjrang,  
Gisik grini bimanga  
Kam·cholono konggranggrang.
- Sona :- Ba·ra chadol bokako  
Be·en mitchi-mitchio,  
Chinode saoba uko  
Nitogenma aganbo.

- Bal :- Nitochong·motania  
Kam-gisikni teng·sua,  
Mikkang-bimang taria  
Bale mesoksusua.
- Sona :- Manden' cholon-rokomko  
Dakmikoba mesoka,  
Sakantini gisikko  
Bewaltangchin paraka.
- Bal :- Indiode aganbo  
Angni rokom-bewalko,  
Ui·ode parakbo  
Mikchaani a·selko.
- Sona :- Janggi an·ma dingsasan  
Sika pante an·chingde,  
Gisik-silchi rongsasan  
Bala ka·san' bibalde.
- Bal :- Aiao! baoni gisiksa  
Angni "Sona" na·ade –  
Gisik – Katchi mitesa  
Aganenga indake!
- Sona :- Gisik-katchi napgija  
Mikcha-namnikaiode,  
Bimang minchirikgija  
Rongdimelgen ka·saade.
- Bal :- Ka·saani mikandalata  
Maiba bilchi pindape,  
Dinclako ching·ata  
Mikchi sona rudape.
- Sona :- Mikchi ka·saan' biginchi,  
Salna ching·a ripamchi,  
Janggin' ripok dokatchi  
Ching·gen kakket ka·saachi.

- Bal :- Ka·saan katta gisikba  
Sona gita gamchakjok,  
Jeba ong·bo indiba  
Da·o attam simsimjok.
- Sona :- Katta ring·a bon·kujaon  
Salba salniangjokma ?  
Dikdiksani gisepon  
Attam ong·galgaljokma ?
- Bal :- Angni “Sona” da·ode  
Nokchi re·pilangbojok,  
Intangode nang·kode  
Nang’ pa ka·chasonajok.
- Sona :- Re·pilnaba dedara  
Nang·ko saksan galange,  
Re·jajokma na·ara  
Da·ode angko nikman·e ?
- Bal :- Jeba ong·bo nang·nasa  
Jajrengman·a inaia,  
Nang·ko grongna sikesa  
Roa dakna am·aia.
- Sona :- Atcha, na·a indiba,  
Angko re·dilatpabo;  
Samjak·bijak dongjaoba  
Meatamko cha·babo.
- Bal :- Maisa na·a da·side  
An·tang saksan re·bara ?  
Da·o re·pilangnade  
Maina kenjok na·ara ?
- Sona :- Ka·saani grangchisa  
Da·si anga bilbara,  
Ka·pakani mikchisa  
Da·o angna nabara.

Bal     :-     Hai, re·bo indide  
                  Rama bako re·naka –  
                  Kena gisik ra·nabe  
                  Anga pante dilnaka.  
                  ...       ...       ...       ...

Uandake uamang  
                  Da·nang re·chakatangjok,  
Uamangni ku·rangrang  
                  Ka·sri-ka·sri chel·angjok.

Boltong sote galako  
                  Balseng Jakbitangpajok,  
Ka·dongate “Sona”-ko  
                  Pante da·nang dilangjok.

Gisik kusi ong·ana  
                  Agangrike re·achim –  
Panten’ re·dilatana  
                  Sonajingde kenjachim.

Unomiting chel·ao  
                  Kinasring sring dakenga,  
Re·a mikkang a·brengo  
                  Balgitchakba gakenga.

Attam sal·ka·sinango  
                  Wa·grip chigrip salakkim,  
Chiring noksik gonggeo  
                  Rong·marangba simdimdim.

Chanchiaton an·tesreng  
                  A·ning a·sak ka·sinjrim –  
Maiabade gingsupeng  
                  Rosoenga chonggrimgrim.

Aiao da·nang maikosa  
                  Brimjang miksugijade,  
Ku·chi mitap niesa  
                  U’ mang chamesakode.

Ka·sariri agane  
U'mang jajrengman·gija,  
Re·baengachim an·senge  
Kena gisik ra·gija.

Rong·ma sepang sokosa  
Jagok-jabrangchakaijok:  
Matcha jrutim bimasa  
Bika bikil ranatjok.

Do·bisani do·rengko  
Deldik chadika gita,  
Sala rangrang rakako  
Aram simdapa gita.

Janggi an·ma dildile  
Kene jadip changaha,  
Kini chachru mopile  
Katna jajapilaha.

Gisik mikmak changaijok,  
Bimang manggisi gita;  
Kipjip romromtokaijok  
Balwa sikdapa gita.

Da.nang gosc Balsengde  
Dikdik ga·akgopmane  
An·tang ka·saatankode  
Gisik ra·a rimbite.

An·tang Sonajingkode,  
Sia-tanga minggija,  
Katjok pante salbite  
Silang-dare watgija.

Bilsa kattimmangangjok  
Nipil nichapilgija,  
Silang dare doangjok  
Sambeng ketchi nigija.

Wa·jak bijak tapsikkok –  
Da·nang ga·soltapangjok,  
Chamesaba rim·rikkok –  
A·kuangchi tang·angjok.

Misil-misil an·sikit –  
Janggi balbo ka·tapo  
Ga·akangjok rang·gitik  
A·bimandu biapo.

Wa·chok sachaka gita  
Jakasini ja·pako,  
Bu·jok datsima gita  
Da·nang pante Balsengko.

“Ae·a maisa” inana  
Nijok “Sona” an·pile,  
Chametangko bu·ana  
Grapjok sitengtopile.

Misiloba kamtangko  
Jaksamgni til·tile,  
Okgalatjok gol·chongko  
“Sona” dekdekjiljile.

An·chi rue jokako  
Sam bijakko sepdape,  
Katipatjok pariko  
An·tang ganako chite.

Matburungni ka·naba  
Ka·saan’ ka·tong rakbatjok,  
Chikrakhgipa matchaba  
Jaksiksrangna pa·jajok.

Salaramni ku·mango  
Jajong jarambongaha,  
Burung a·bimanduo  
Attam andalsikaha.

Re·dilatna chakatjok  
Sonajingko noktangchi  
Pari saoba che·eljok  
Gol·dik chane ja·manchi  
... ..

Bal :- Aiao na·ade me·chikde  
Me·chik gun ginangbea,  
Sam bijakko sepdape  
Sanna-bana changbea.

Sona :- Me·chik mande inode  
Samko gunko man·osa,  
An·sengpana sikode  
Am·bo manden' gunkosa.

Bal :- An·sengpana sikoba  
Soka a·sel nangani,  
Manden' gunko am·oba  
Donga dake-niani.

Sona :- Him angai goserong,  
Da·a salsa bebema –  
Kining-ripik ang' rasong  
Balwao balpongangjokma ?

Bal :- Similchipchip bibasa  
A·gimikna chadoa,  
Bu·suari golapsa  
Nitoriri balgaoa.

Sona :- Da·nang gose na·ade  
Angko re·dilatesa –  
Dukko man·jok indake  
Pante ka·sa-ka·sasa.



- Bal :- Ronggrikbata ka·tongo  
Kakket ka·sagrikani –  
Giisik re·a mikkango  
Donga ja·gitotani.
- Sona Nang·ni watatmitingo  
Anga re·bapilode,  
Gong jawachim da·nang mo  
Nang·na ia dukrangde.
- Bal :- Pak ong·oba maikangen  
Ong·a a·sel nangesa,  
Una sako matnanggen  
An·tangtangni giminsa.
- Sona :- Alongipa gita  
Angko re·dilatmane,  
Anga me·chik mandesa  
Ka·sapae kemane.
- Bal :- Angni ja·a amjana  
Ka·sindugae re·akon:  
Attam walangengaha  
Gong·rakkalo namgenkon.
- Sona :- Gong·rakkale re·naba  
Ja·ku tang·bikpilaijok;  
Attam waltinggenoba  
Jajong jasengba·engjok.
- Bal :- Gong·rakkale re·aibo,  
Nang·ko rike niaigen;  
Ong·ja noba re·sobo  
Anga ja·man re·anggen.
- Sona :- Aiao maikai galnapgen  
Pante silma·silpako,  
Nang·mung damsan re·aigen  
Ka·sineba re·aibo.

- Bal :- Aiao na·ade nomilde  
Gisik ripa-ripasa,  
Jena man·ja man·ade  
Re·bo nang·ni sikasa.
- Sona :- Nang·ni a·sel nangana  
Da·o watgalanggenma ?  
Do·sing, do·kru, moena  
Paksamsachi bilama ?
- Bal :- Do·sing do·kru moena  
Maia do·sa na·ara ?  
Do·rimitma tangsekma  
Banonisa bilbara ?
- Sona :- Do·rajama do·pama –  
Na·a maia do·sachim ?  
Cha·am-roamasama  
Bachinasa bilachim ?
- Bal :- Do·ma rama brangama  
Songdu chijol jamang ?  
Rama chel·engkuama ?  
Aganboda chanchie.
- Sona :- Ong·ja, pante, chel·jaha  
Songo sokna sepangjok,  
Kenna nanga dongjaha  
Achak sing·a kinaengjok.
- Bal :- Angni jajrengman·ara  
Intang noko sokona,  
Maiko tol·gen na·ara  
Nang' ma nang' pan' sing·ana ?
- Sona :- Oe, nanggo bebemai  
Badi ine tol·najok;  
Na·an aganpabowai  
Anga tol·e ninajok.

Bal     :-       Ong·ja, “Sona” dakmalja –  
                    Kengenoba gisiko,  
                    Ma·a-paana tol·malja  
                    Agan’ kaket-bebeko.

Sona    :-       Atcha namgen indide  
                    Kakket aganainaha,  
                    Duk ong·oba da·ode  
                    Noko’ soknasiaha.  
                    ...           ...           ...           ...

Unomiting somoion  
                    Jajong jatengbrakaha,  
Song’ na gadoangjokon  
                    Achak sing·soengaha.

Nokni sara-a·tala  
                    Sepangona sokangjok,  
Noko mande il·ila  
                    Giseako kinajok.

Te·brong ja·pang mitino  
                    Umang chadengdikaha,  
Jegrikani a·selko  
                    Kinatime niaha.

Sonajing-ni pagipa  
                    Manengenga jiktangko,  
Ku·namgija ma·gipako  
                    Katatana detangko.

Saia-ina dongjachim  
                    Un salode ma·gipa,  
Bebera·na man·jachim  
                    Indioba pagipa.

Maina gipin salrango  
                    Me·chik manengrakhgipa -  
Manengronga detangko  
                    Sonajingni ma·gipa.

Jikni jechakrakana  
Setang ka·o nangbajok,  
Me·chik bamna sikjana  
Dokgriknasipilengjok.

Sing·rakgipa achakba  
Unomiting chachao –  
Chanapnape sing·aha  
Sonajing mung Balsengko.

Gisik ka·o nangana  
Ka·tong chakna man·jae  
Rikangaha achakna  
Sonajingpa ka·done.

Mesokna ‘ne chanchie  
Sonajing-de an·tangko –  
Jimje-jimje jipjange  
Nakatsojok sarao.

Deldik chadika gita  
Detangkosa nikdike,  
Sonajing-ni pagipa  
Rimbapiljok mol·mole.

Ma·a-paara detangko  
Sandimiting somoio,  
Niksoe Sonajingko  
Ka·dimejok gisiko.

Jikse gisegrikaba  
Jripjrang namangpilaha,  
Detangko niksoenba  
Ka·a bemangrikaha.

Re·angenba bachina  
Atam walna nangaha –  
A·selko aganchina  
Sonajingo sing·aha.

Pagipani indake  
Sing·ako aganchakna,  
Kene dongjok bamgope  
Pa·srangjaemung parakna.

Nike deni kenako  
Da·nang pagipa injok,  
“Aganaibo bebeko  
Nang·ko ka·o nangjajok.”

Ka·sariri patangni  
Mol·molana an·tangko  
Bakan ong·jok ku·sini  
Sonajingni gisiko.

An·pilemung nichaoe  
Pilsa rang·sipeaha,  
Da·nang “Sona” ka·donge  
Kakket agansrangaha.

Kakketko aganana  
Pagipaba namnikjok:  
Balsengko rimechina  
Sonajingkon watatjok.

Sonajingba re·ange  
Kattarangko aganjok,  
Balsengkoba ka·donge  
Noktangona rimbajok.

Niksoenba Balsengko  
Sonajingni pagipa,  
Rimchaksojok noktango  
Mande chanchininggipa.

Sonajingko okame  
Da·nang uni pagipa,  
Aganaha indake  
Soka chakchina gita.

“Do·o bipa sa·rongko  
Doke song·e cha·dilbo,  
Gal·da gisi purako  
Bijak song·e on·pabo.”

Sonajingpa re·ange  
Songni saksa panteko  
Aganejok indake  
Dakna simsakaniko.

“Saksa pante chingona  
Sokjok da·al atamo,  
Nokpanteo tuchina  
Intang uko rimebo.”

Songni saksa me·apa  
Nanga gita simsakjok,  
Sonajingni pagipa  
Nokchi tuna re·angjok.

... ..

(Babilsio )

Sona :- Him- angai, da·osa  
(Ka·sine) Janggi gisik pangsangjok,  
Kenengachim doknasa  
Da·ode kenna nangjajok.

Bal :- Oe da·nang nang·nade  
Mamung dukni dongjajok,  
Indioba angade  
Ja·a pari sabaengjok.

Sona :- Aiao da·nang go·semo  
Intang anga tarina --  
Na·a sengpakubo mo  
Anga miko song·kuna.

Sona :- Aiao, ong·jok da·ode!  
Chi basingde ran·changjok,  
Maiko dake angade  
Meatamko song·najok.

Bal :- Chia bachi chel·ama ?  
Ja·a saoba che·elna –  
Chiring chikol dongama ?  
Anga ko·e on·ena.

Sona :- Chide chiring pongriting  
A·ba rama kamachi –  
Rama daka ta·dingding  
Aoachipak a·kongchi.

Bal :- Indiode “Sona”-ne  
Na·a noko dongsobo,  
Ja·a saoba ka·sine  
Ra·ba basing on·atbo.

Sona :- Nang·ni ja·a pariko  
Na·a maina che·elgen,  
Sokbagital panteko  
Anga maina ko·atgen.

Bal :- Nang·ko saksan watate  
Anga rorikgenode –  
Pante bi·sa ma·ate  
Ka·rakjajok angade.

Sona :- Ka·tong ka·rakaniba  
Ja·a·jaka namosa,  
Chiko·walko ko·naba  
Ko·na me·chikni kamsa.

Bal :- Agre, seng·a daknabe  
Bakbak basing ra·babo,  
Watnapja chong·motode  
Wa·al nate re·babo.

Sona :- Hai, re·bo hai indide,  
Angan de·na basingko,  
Re·bo pante ka·sine  
Jakwatnabe gol·dikko.

... ...

Chiring chikol ka·sina  
A·kong dare ka·sinjrim,  
Jatengoba andala  
Bolgrim wa·grim salakkim.

Unomiting chachao  
Jajong aram simdapjok  
A·bri a·kong gimiko  
Mitmat mitmat andaljok.

Noksul noksagipachi  
Gusukelokatenga,  
Songni kosak burungchi  
Do·po illuruenga.

Uandake re·ange  
Chigaona sokangjok,  
Kengenoba ka·donge  
Chiko ko·e ra·bajok.

Sing·o basing de·ange  
“Sona” mikkang re·angjok,  
Balseng gol·dik su·chane  
Wa·al nate dilangjok.

Duk ong·oba indake  
Ka·sin ka·sin re·bajok,  
Jeba ong·bo da·ode  
Noko sokbapiltaijok.

Merong mema goromko  
Song·na me·dik chanatjok;  
Do·o bipa sa·rongko  
Doke bijak song·atjok.

... ...



Sona :- Pante ropakubone,  
Nang·na bijak song·kuna;  
Ino asongkubone  
Anga pura song·kuna.

Bal :- Golpo ka·joljolari  
Mi·bijakko song·aia,  
Bikbik re·mikmikari  
Maina gong·a dakbia.

Sona :- Gong·a daka jokona  
Mi·bijakko minmanjok,  
Anga chiko rukuna  
An·ching miko cha·najok.

Bal :- Da·ogalgal bakbakan  
Mi·bijakko minjokma ?  
Nang' pa maang pilakan  
Cha·man·ringmanahama ?

Sona :- Babamaang pilakba  
Meatamko cha·manjok,  
Samjak·bijak tojaoba  
Pante cha·e nibojok.  
... ..

Lota rimitichinchino  
Chiko rue donaha,  
Rangtal ringrang ringrango  
Mepal dine on·aha.

Mi·bijakko donchakjok  
Ampatchiko andape,  
Jaksuchakna on·pajok  
Rangkareko ra·one.

Mia·chia dinman·e  
Sonajingba pantena,  
Mepaltangko ra·one  
Donjok damsan cha·pana.

Uandake simsake  
Song·e·chane on·paha,  
Uamang da·nang okkrie  
Cha·na a·bachengaha.  
... ..

- Sona :- Krat-cha dakpanabene –  
Jawa gita dakgija,  
Cha·bo pante ka·sinne  
Sam-bijaksa topaja.
- Bal :- Krat-cha dakna nangpaja  
Me·a-bi·sa pantede;  
Mikasale nikpaja  
Agre sontol dakode.
- Sona :- Rinok-rinok sontole  
Bewaltangko mesokna,  
Donman·aha ma·ate  
Me·chik mande pilakna.
- Bal :- Nang·ni bijak song·ako  
Cha·na bon·jawahakon,  
Do·o mangsa gimikko  
Angna satokaiakon.
- Sona :- Maisa uan cha·jokma ?  
Na·a cha·sikkelakon:  
Bijak song·a namjama ?  
Angan song·na changjakon.
- Bal :- Cha·a badi cha·kuna –  
Cha·e nion bon·jajok,  
Sikangaia cha·kuna  
Bijak-song·a tobejok.
- Sona :- Song·na-ritna changpaja,  
Pante jeba inaibo,  
Cha·manode indiba  
Ia chio jaksubo.
- Bal :- An·tang changtelaianma ?  
Bijak song·na changbejok,  
Me·tramiting nasama ?  
Jeja-galjamanchajok.
- Sona :- Cha·man-ringmanjokode  
Ia morao asongbo,  
Jakko jaksuman·ode  
Ang' chadolchi ipakbo.

Bal     :-     Aiao, na·ade da·alde  
                  Ka·srok-ka·srok rodila,  
Angni ja·a-saakode  
                  Na·a gualatpila.

Sona    :-     Bebe nanggo oemai,  
                  Angni gisik do·bokde,  
Gualenga maibakai  
                  Nang·ni ja·a-saakode.

Sona    :-     Da·on gisik ra·miting  
                  Dakna nanga kamtango,  
Chiba ding·bom ding·miting  
                  Su·srangatna pariko.

Sona    :-     Nang·ni mata pariko  
                  Ka·sariri su·sranggen,  
Angni china chadolko  
                  Chite uko katipgen.

...       ...       ...       ...

Misiloba til·tile  
                  “Sona” su·srangataha,  
Pari samko dapate  
                  Ba·ra ka·tipataha.

Ga·chelani bilongjok  
                  Wa·chong bu·a paria,  
Su·srangmano sabatjok  
                  Samni bisi chipana.

Mikwak-pewak dakari  
                  Gisik chaktosojaha,  
Sonajingde dongari  
                  Ka·tong sachaksoaha.

Walba ka·sindikdiksa  
                  Jajong onchokangengjok,  
Denggokari dongesa  
                  U'mang agangrikjajok.

Dikdiksana indake  
Dongjok kalima gita  
A-sel nangao ga-ake  
Muni pindapa gita.

Unomiting somoion  
Achak sing-soengaha –  
Pante saksa Balsengkon  
Rimna re-baengaha.

Sonajingni pagipa –  
Jeko aganbamanjok,  
Uni aganbagipa  
Pante da-o re-bajok.

Nokpanteni pantesa –  
Uni bimung Doenang  
Balsengko rimangnasa  
Re-bajok gose da-nang.  
... ..

*Doenang* :- Mama Balseng dongama ?  
Che, ong-jamo kemane,  
Nokpantechi re-genma ?  
Tue ropanakode.

Bal :- Maisa pante na-ara  
An-tang Sangma de-ama ?  
“Mama” inbingbangara  
Angko mikkang talama ?

Doen :- Chengo robarongana  
Nang-ko chinga ui-a,  
Sangma pante jokona  
Songsonganti niksenga.

Bal :- Mama nachil-aknabe,  
Jawa gipinni noko –  
Agre rasong daknabe  
Marak nomil' mikkango.

- Sona :- Nachil-akgenchimoba  
Kinagenma gipinrang --  
Bebe da nang indiba  
Seng'a Sangma panterang.
- Doen :- Na song watnapgrikjaoba  
Walde waltingangengjok,  
Mikil tuna sikjaoba  
Hai, mama hai re najok.
- Bai :- Su srangako pa siken  
Ja a pari sabatjok,  
Anga maikai re pagen  
Ja a ga nan man jajok.
- Sona :- Atao na aba nipabo --  
Maikai re anggen da nang,  
Na an batimangpabo  
Nang' mamako Doenang.
- Doen :- Re na man chongmotjaode  
Anga maiko dakkuna,  
Ba timpabo inode  
Re ba, mama ba timna.
- Sona :- Da mo, na a Doenang  
Sengku da a re angku,  
Andap-pindapanirang --  
larangko ra angku.
- Doen :- Cheche, na a maikosa  
Aganenga indake --  
Asimalgijakosa  
On atenga na ade.
- Bal :- Bebe, nanggo namjawa  
On atnabe "Sona"-ne  
Angna mamung nangjawa  
Tom tom tusirikbone.

Doen :- Maisa, mama donbojok  
Na·mang ka·pakgrikako,  
Nang·ko ba·an jrimengjok  
Ambajaengjok neng·ako.

Sona :- Ka·san gisik balbringbring  
(Balsengna) Walo teng·sudapchina,  
Teng·sugipa Salni Pring  
Nang·na rasong nachina.

Bal :- Angni ka·tong gisikchi  
Sonan' jagring napegen,  
Nang·ni ronggrikanichi  
Gronggrikani nabagen.

Sona :- Angni Pante Rongjanggi  
Ka·saa ronggrikkubone,  
Tusioba jumangchi  
Angna mikkang pa·bone.

Bal :- Ka·san Sona biginchi  
Walo ching·chetrikbone,  
Ekgrikani kattachi  
Pante nang·na Salamne.

Sona :- Ka·pak·ka·pak balbringbring  
Pante ekgrikangbone,  
Ka·san bibal similding  
Balwao nang·na Salamne.

... ..

{ Skanggipa Bak Bon·aha }  
{ Gnigipa Bak Dongenga }

# SONAJING

(Ka·saan' Git)

## BAK – II

Uandake ekgrikon  
    Ka·pak-ka·pak gisikchi –  
Jajong sime napangon  
    Walde ong·jok waljatchi.

Balsengkode Doenang  
    Nokpantechi rimangjok,  
Janggilsako kang·jangjang  
    Ka·sa-ka·sa ba·angjok.

Sara wal·tim sikako  
    Chia rudapa gita:  
Janggilsalbaramako  
    Salakkimdapa gita.

Indioba dingtangja  
    Sonajingmung Balsengde,  
On·tisaba dimelja  
    Gun-gisikni namade.

----

Ballinggiri gittimo  
    Donga saksa buchuma,  
Songsonganti gimiko  
    Me·chik namgijagipa.

Ukon minga Jo·jengma  
    Kal·ak-sinakravgipa,  
Me·chik randi buchuma  
    Nokte-a·te donggipa.

Me·chik mikburakgipa  
Sikal-kamal mikmarang –  
Matcha pil·na changgipa  
Mikgittalba sikatang.

Gipin ong·ja Jo·jengma  
Kenjagokatna gita,  
Pil·jok matcha dal·gipa  
Sebagimino gita.

Sonajingmung Balsengko  
Matcha pil·e timsojok,  
A·bimandu biapo  
Uamangko kenatjok.

Da·oba pil·sa chanchijok  
Jo·jengmade gisiko –  
Kal·aktaina miksongjok  
Da·nang pante Balsengko.

Doenangmung Balsengko  
Nokpantechi re·ango -,  
Nikwatatjok u'mangko  
Jo·jengmade noktango.

An·tang deme·chiktangna  
Balsengkode mangsongjok,  
Sam-mikmalchi malatna  
Jo·jengmade chanchijok.

Me·chik denggu mikbue  
Panten' rasong mikkimko;  
Dakmajona mangsonge  
Samkal·akjok bisongko.

Uandake watatjok –  
Mingtasini montorko –  
Sippodape mingatjok  
Doenangmung Balsengko.



Samko sippodapaton  
Doenangmung Balsengde,  
Nokpante' na sokkujaon  
Tang·doangjok bisongde.

Ba·a ginang Balsengko  
Doenangba tang·dojok,  
Kosakjoljol bisongko  
Bawil-mittil man·dojok.

Sako meraa gita –  
Tang·on-tang·do dakangjok;  
Gal·mak balpaka gita  
Nikrikmangmangarijok

Kabite wata gita –  
Doenangmung Balsengde,  
Jonja ma·galja gita  
Ja·bra-jakbra bisongde.

Uni gimin uamang  
Jajreng kenjagokenga;  
Balseng aro Doenang  
Agangrikjoljolenga.

Balseng:- Aiao! Maia ong·asai –  
(mangkaljole) Maisa na·a Doenang  
Maina bilbitengasai  
Neng·pajama ang' ginang ?

Doenang :- Pante anga an·tangtang –  
Salo a·ko re·gipa  
Basakoba sikatang  
Walo bile rogipa.

Bal :- Indioba uara  
Jajumangchisakonba –  
Walo bile rooba  
An·tang saksansakonba ?

Doen :- An·tang saksan bilode  
Agre balbojengbea –  
Biltoriri bilnade  
Sakginisa nambea.

Bal :- Agre bal·ekkunabe, -  
An·ching a·sel nangjokkon,  
Sepangjokma nokpante –  
Aiao badibajokkon ?

Doen :- Aiao da·nang na·ade –  
Baoni nokpantekosa –  
Bilwengwatbaman·eba  
Gisik ra·a da·osa ?

Bal :- Maisa, Doen', indide  
Bachinasa bildila ;  
Wate nokpantekode  
Maina bile rodila ?

Doen :- Oe, bebe, maiasai –  
Da·a walde an·chingde –  
Maiamancha ong·joksai  
Ui·jaengjok angade.

Uandake an·tangtang  
Ja·bra-jakbra bilangjok,  
Balseng aro Doenang  
Songgipino onchongjok.

Ballinggiri songosa  
U'mang onchongeaha,  
Do·gisiknasiosa  
Bilonchoketokaha.

A·na onchokarion  
Bawil-mittil tang·angjok,  
Chakatsrapna man·kujaon  
A·ajoljol romromjok.

“Atcho, watbo” ino ba  
U'mang watna man·jaha;  
Aktetgale nioba  
Ma·gapsimsimaiha.

Mamasaba indake  
Romrom-mittal tangangjok,  
Rompedapodapode  
“Ai·a-ai·u” intokjok.

Bolma-boltong tong·sako  
Rompeatenga gita,  
A·kongchina amdolko  
Balpakangenga gita.

Romrom-mittal tang·ange  
Nokte noksao sikkatjok,  
Doenangmung Balsengde  
Jo·jengmaona sokangjok.

Sikkatari bakbakan  
Dimbang-tapang ma·aljok,  
Mamasaba sakprakan  
Skang gitan ong·taijok.

Doenangmung Balsengko  
Rang·san niksoarion,  
Sing·soaha bisongko  
Jo·jengmade noktangon.

Jo·jengma:- Angnan sua-samama  
(ui·ja dake) Baoni gital panterang –  
Walchang-salchangasama  
Bachinasa jojongrang ?

Doenang :- Sangma pante ma·ate  
(nachil·ake) Do·do pil·e bilbara,  
Nokpanteko jamange  
lanona sokbara.

Jo-jengma:- Robo, ang ' gri, ang' jongrang  
Cha·a maiko cha·gini,  
Dongbo, Sangma panterang  
Maina bachi galgini.

-----

Randi me·chik Jo·jengmao  
Donga saksa demechik,  
Ballinggiri gittimo  
Uko minga Norindik.

Norindikba mandede –  
Me·chik rongchingkal·gipa,  
Ballinggiri songode  
Nomil nitobegipa.

Nomil-an·gil silako  
Uko jena man·jachim,  
Indioba gisiko  
Cha·chipila ginangchim.

Jo·jengmade Balsengko  
Sammikmalchi kal·akna,  
Chanchiaha gisiko  
Demechikna malatna.

Panterangko nokchake  
Demesajok detangko;  
Nampinika daksoe  
Soka-chakna bisongko.

Jo·jengma:- Norin' do·mikgilara  
(Norindik-ko Mikrakbo wai me·chika –  
de·mesae) Pante gital sokbara  
Chakatbo wai rania.

Jo·jengma :- Togijako kolchina  
Song·na me·dik chanatbo:  
Cha·e chi-ringsikchina  
Rongkit weke on·ebo.

De·mesasrapkujaon  
An·penbaa dakmikjok,  
Adi donge dikdikon  
Nomil chakatbaengjok.

Kini tangsimbitbitko  
Engbaljake watari,  
Me·chik ba·ra tangsimko  
Chinpakjola dakari.

Norindikde me·chikde  
Chakat-simakariba,  
Gane rojok pal·ape  
Sona naringrotkoba.

Ku·chimitmit ka·dinge  
Sontol dake mesokjok,  
Ringrengreng re·bae  
Pa·ripjangjang aganjok.

Uandake chakate  
Wal·tim sike on·ejok,  
Seng·na andalsikchange  
Unon walba seng·bajok.

Norindikde mikchajok  
Da·nang unon Balsengko;  
Me·chik ka·sanapmanjok  
Nikarion panteko.

Nomil mikkang silana  
Gisik ka·srokbaloba,  
Da·nang Balseng me·chikna  
Ka·sanapja indiba.

---

Noksam-nokgilwilwile  
A·ko salwilwilaha:  
Jo·jengmade janggile  
Samchi muni piaha.

Indioba Jo·jengma  
Sammikmalko wataton,  
On·sretatjok Doen'-na  
Gitik-gitak tarion.

Indakesa sammikmal  
Doenango nangaha,  
Da·nang pante agital  
Norindikna malaha.

Indioba Norin'de  
Doenango mikchaja,  
Balsengna 'gre nomilde  
Sakgipinna ka·saja.

Pante Balseng indiba  
Norindikna mikchaja,  
Sammikmalchi saloba  
Samde uno nangkuja.

Jeba ong·bo Balsengba  
Donge roa dakangjok,  
Sam·sinakna kenenba  
Mikcha·dake mesokjok.

Doenangde indiba  
Gisik nom·angahachim,  
Sammikmalko man·enba  
Ka·sanapangahachim.

Norindikde indiba  
Doenango mikchaja,  
Pal·apgrika dakoba  
Una ka·sanapkuja.

Uandake roari  
Waltu·saldongangaha,  
Mikchagrika dakari  
Pante Balseng roaha.

Do-o doksimsimari  
Bijak song-e on-aha,  
Alnammika dakari  
Name soka-chakaha.

Jo-jengmade an-tangde  
Gisikode mangsongjok,  
Doenangko man-ode  
An-tangnasa chanchijok.

Uandake uamang  
Che-e ringe roenga;  
Balseng aro Doenang  
Dikdik kusi ong-enga.

Panterangko malatna  
Man-jok ine chanchie,  
Norindikmung Jo-jengma  
Kusi ong-jok rokreke.

Uandake uamang  
Ringe-cha-e rodiljok,  
Balseng aro Doenang  
Bitchi ringe pekbajok.

Okko dama dokari  
Rokrek-chokchek dakangjok,  
Jakko bangsi sikari  
Mamasaba mesajok.

Pante Balseng an-tangde  
Kusi ong-a dakmikna,  
Chroka dakjok bawile  
Jinma ja-rikpachina.

Norindikde nomilde  
Ja-chrap-ja-chrap Balsengko –  
Ringreng ringreng ka-dinge  
Chrokangpajok ki-sango.

Doenanga pantea –  
Da·nang Norindikkosa –  
Ki·sang·ki·sang ja·rika  
Mikchanape bikosa.

Jo·jengmara me·chika  
Pante Doenangchisa,  
Nangsrap·nangsrap sinchepa  
Jakko gowingwangesa.

Uandake uamanga  
Bawil·mittal chrokangjok,  
Balseng jechi mikkanga  
Uchin·ja·chraptokangjok.

Balseng dama dokangjok  
Me·dikkuko katipe;  
Doen' bangsi sikangjok  
Am·boljako dambenge.

Gogai doke Norindik  
Pal·ap·pal·sap mesajok,  
Jo·jengmaba wasimdik  
Jakpa doke ku·gapjok.

Ringe pekenga gita  
Rokrek·chokchek gimikan,  
Nokma wangala gita  
Cha·e·ringe an·sengan.

Gingsiripang balbringbring  
Bal·ek·bal·tek roangjok,  
Norindikde 'Serejing'  
Kattarangko ring·angjok.

Norindik:- Da·nang gose angade  
Aiao maiko dakkuna –  
Pante Balseng an·chingde  
Mikmakpil·e an·sengna.



- ” :- ‘Sako balboa gita  
Kusin’ balwa balsiri,  
Gisik balgaoa gita  
Ka·pak-ka·pak ka·sari.
- ” :- Bibal gitchakanasa  
Bija ma·dimasama ?  
Gisik ka·srokatnasa  
Angmung roa dakama ?
- ” :- Maiko cha·na sikachim  
Agan’ pante parake –  
Maikomancha nangachim  
Agan` angna ku·gape.
- ” :- Pante kema ka·bone  
Angni katta ring·ana,  
Bimang nitopajane  
Changja kusi ong·atna.
- ” :- Pante na·a kenama  
An·tang gisik ra·ate –  
Sakgipinko nikama  
Angna bate nambate ?
- ” :- Nika-nia dongoba  
Ramram me·chik man·jawa,  
Janggi sina nangoba  
Anga nang·ko watjawa.
- ” :- Ka·o nangpanabene  
Angni katta gam·ana;  
Gisik sapanabene  
Me·chik’ nachil-akana.
- ” :- Walde wahjatchi ong·jok –  
Pante na·a neng·jokma ?  
Ajam ku·akbaengjok  
Pante tuna sikjokma ?

” :- Ong·pajaoba angade  
Nang·ni chame Sonajing –  
Tariman·jok nang·nade  
Tuna a·dam similding.

Norindik:- Tuna mikgil sikjaoba  
Tugitile robojok,  
Biap a·dam namjaoba  
Pante na·a tu'bojok.

Unomiting somoio  
Jo·jengmamung Doenang,  
Asongari wal·timo  
Rotimpajok uamang.

Asongmangmangariba  
Be·en moringrengaha,  
Gaku-gaku dakenba  
Jakpa doke roaha.

Asong chong·gomjoljole  
Doenangde pantede,  
Am·boljachi todinge  
Grika dakjok biade.

Am·pok ja·gro bolsako  
Seppi dake chakaha,  
Am·bol cha·gro ja·sako  
Mil·am dake engaha.

Wal·timsamo dongari  
Grika dake roaha,  
Engding·den·ding dakari  
Pante toreangaha.

Nangna gitik dakpile  
Jo·jengmako engdingjok,  
Kotip poksilokpile  
Jaktong·ja·tong krengangjok.

Nangsráp-nangsráp dakana  
Kene da nang Jo-jengma,  
Rang·san jitjok pantena  
Me·chik bilgri buchuma.

Am·bol ga·tingdelmanjok –  
Jo-jengmade bikbake,  
Joljol ga·akangaijok  
Wa·alchina chikkipe.

Attam wal·tim chakani  
Wa·al dareripripa,  
Bolong anggal so·ani  
Wal·ki gijik-gijika –

Mitim cholcholdapako  
Delip kamsóa gita;  
Wal·sareo kilapko  
So·dikatenga gita –

Ga·akangsrápkujaon  
Ba·rao wa·al cha·bakjok,  
Salongkatna man·kujaon  
Ganchi gita kamengjok.

Dikdik salongkatoan  
Wakichengcheng dakaijok,  
Be·en bigil gimikan  
Nina misil-misiljok.

Wakko so·a gitasa  
Gijiltokjok an·bigil,  
Me·mang gitting gitasa  
Wagamari wachekjil.

Ku·gapangari ku·sik  
Ku·sa aganangaijok,  
Jo-jengmade rang·gitik  
Da·nang janggi galangjok.

Norindikde me·chikde  
Da·nang an·sre mopile,  
Ma·gipako gipake  
Grapjok sidekdekpilē.

Doenangba panteba  
Grape mesokmikaha,  
Ku·chi sosiatenba  
Mikchi ong·a dakaha.

Balsengara mittinchi  
Bamchikkope dongaha;  
“Kik-kik” ine gingtingchi  
Grapna changja dakaha.

Jaknokgipa siana  
Sambisiba rim·jajok,  
Jabirongchi watana  
Ku·ba minge ke·jajok.

Sam·ku·biba mingarang  
Balwao balpongantokjok;  
Mingtasini montor-rang  
Da·o mamung ong·jajok.

Unochacha bakbakan  
Balseng aro Doenang,  
Timing-timang damsanan  
Katangaha uamang.

Uandake katangjok  
Doenangmung Balsengde,  
Dikdik nipilangjajok  
Mamasaba bisongde.

U'mang katangman·joko  
A·kim gabagiparang,  
Nokni noksam-nokgilo  
Randingejok matcharang.

Maina da-nang Jo-jengma  
Matcha pil-e roronga,  
Sikkal-kamal buchuma  
Jachri-janap donronga.

Unochacha manchade  
Norindikde sibokjok,  
Da-nang gose me chikde  
Kene manggisajok.

Maucharangni gisepo  
Dal-batgipa mangsade  
Manggisiko jangtongo  
Balangaha chikkape.

Palak a sel ong-arang  
Bon-angaha dikdikon,  
Randinggipa matcharang  
Walni andalpition.

----

Doenangmung Balsengde  
Da-nang katjoljolangjok;  
Songchi-nokchi mikkange  
Rama-ja-kol sanjajok.

Walni jatchi batango  
Uandake katangjok,  
Burung a-bimanduko  
Simang-tangmang batangjok.

Ga-akoba a-selo  
Majoani chejajok,  
Do-gisika paksao  
Rama-ja-kol nadikjok.

Dikdiksani ja-manon  
Seng-a jaseng-brakaha;  
Ramajoljol re-angon  
Salba jrangjrang nabaha.

Ramadingding re·ange  
Chirikamna sokangjok,  
Panterara an·senge  
Anti a·dam nikejok.

Dimrim Patal inesa  
Minga ua a·damko;  
Rimrim Anti inesa  
Mingsingbea a·kangko.

Rimrim Patal antio  
Bang·a nie-roani;  
Anti a·kangni salo  
Gisik an·saoatani.

Uni sala antin' sal  
Mande rue jimbajok,  
Dimrim biri rong·patal  
Warekdimdim nikaijok.

Chengo mingsing-minggama  
A·chik pagitchamrangni,  
A·chik katta agana  
Chengon' gisik ra·ani.

Anti cha·bebeangjok  
Wekwak do·jinma gita,  
Il·ilgingim a·dingjok  
Wano ringenga gita.

Me·gam badinggiparang  
Atte silmang botbajok,  
Rori na·palgiparang  
“Ra·bo mama” inbajok.

Ta·ma, e·ching, jalikko  
Biri gita chong·aha,  
Sim·pak reseginrangko  
Mande A·chik palaha.

Palgiparang palangjok  
Dandak dandak chong·doe,  
Ra·giparang ra·angjok  
Sikatangtang goange.

Bil susana atgipa  
Rimrim Patal antidam,  
Nomil nama segipa  
Mande A·chk susaram.

Dimrim Patal kosako  
Mande timoltokaha;  
Nomil jinma jatchio  
Re·mikmake balaha

Chengo A·chik manderang  
Rimrim antini salo –  
Seokronga panterang  
Nomil nambatgipako.

Nambatgipa ba·rako  
Una on·na man·gipa  
Man·gen ua nomilko  
Mande man·e cha·gipa.

Anti a·dam chisamo  
Mande dolsa tom·bajok.  
An·cheng saporirio  
Gando makkal palbajok.

Me·gam dakgrikrakgipa  
Ra·biatjok dakgrikna,  
Bilko susarakgipa  
Rakgipamung susana.

Me·gam Gonggrot Rakgipa  
Ine uko mingsinga,  
Chalang dakgrikrakgipa  
Bobil dinge roronga.

Ra·biana chonnike,  
Pante chaktonapjaha,  
Jeba ong·bo ka·donge  
Balseng da·nang chabaaha.

A·kong rong·kuchakpile  
Nigiparang inchrojok,  
Sawa amgen chanchie  
Pil·sa jajrengchakatjok.

Ja·tong-jaktong pe·grike  
Dakgrik-sikgrikangengjok;  
Dikdik dongon ga·ake  
Balseng da·nang tang·angjok.

Bikbik an·pilbaari  
Chakattaijok panteba,  
Ta·kreng-cheng-reng dakari  
Dakgriktaina inenba.

Jol·jol bilbil sikgrike  
Pil·sa dakgrikangtaijok,  
Bipa pante ma·ate  
Balseng warachakbajok.

Changkichonko wenkote  
Pante ja·tong pe·aha;  
Dikdik donge su·krope  
Me·gam pangpikangaha.

Me·gam dakgrikrakgipa  
Ka·o nange chakatjok,  
Dakgriktaina inenba  
Wagam chikmijilbajok.



Raka pante Balsengba  
Name warachakaha,  
Chalang rakgipa gita  
Dingna tarisoaha.

Bilsa sikgrikangtaijok  
Do-o sugrika gita,  
Mojim-siksakangjajok  
Apsan bilgrika gita.

Siwing-sikot indake  
Adigita dakgrikjok,  
Me-gamkode Balsengde  
Changsa ja·tong pe·taijok.

Bolma supea gita  
Me-gam ga·akangaha,  
Rong·ma jilgala gita  
Rimtim romromangaha.

Nigiparang warekdim  
Jikjak-jikjak inchrojok,  
Uan baoni pantechim  
Sawa ine sing·tokjok.

Sangma pante goera  
Ine Doen' aganjok,  
Mitesakni Salgira  
A·chik pante ma·atjok.

Mande jinma inchrojok,  
Rasong on·e Balsengna;  
Antidamchi rimangjok  
Uko chalang songchina.

Rasonggragra a·sakna  
Bimung mingsingataha;  
Tangbangchina A·chikna  
Uko chalang songaha.

Me·gam Gonggrot dal·gipa  
Ja·tong samsa be·aha;  
Mingsingminggamrakgipa  
Ga·akromromaiaha.

Uni songni manderang  
Uko songchi ba·angjok,  
Me·gam badinggiparang  
Songchi katpilangtokjok.

Un' salode antiko  
A·chikrara cha·tokjok,  
Uni salsagipao  
Songtangtangchi re·angjok.

Pante Balseng indiba  
Gisik mikrakataha,  
Simsaksona inenba  
Tom·e chanchidilaha.

“Ka·namgija Me·gamrang  
Kajiako botode,  
Bobil dingrakgiparang  
Pil·e dakgriktaiode –

Rori matcha chikarang  
Mikkang anti re·bagen,  
Me·gam sale sotarang  
A·chikrangko dakgrikgen.

Uni gimin mikrakbo  
Songsonganti pilakan,  
Silchidare kebabo  
Mikkang anti sakprakan.

Songantio donbabo  
Mande songko nirokna,  
Bobil·ginal sokbao  
Nagirako dokchina.

Dingram Gitok A·dokko  
Bobil dingna napbagen,  
Rong·ma pattal gitokko  
U'mang bate re·bagen.

Uni gimin taribo  
Rong·te rompedapsona,  
Manderangko donsobo  
Rong·ma childosochina.

Dingram Gitok mingsinga –  
Sima-a·dok batsotram,  
Pilakchikon niksenga  
Silang-dare ga·batram.

Uandake aganjok  
Pilak A·chik mandeko,  
Pante Balseng mangsongjok  
Warachakna bobilko.

Bebe namgen inemung  
Pilak Songni mandeba –  
Apsan inchrotokemung  
Ra·chakaha jinmaba.

Doen' bal·ekrakgipa  
Aganbal·ekdatapjok,  
Pante nachil-akgipa  
“Da·wat, da·ken” inbajok.

“Bobil sianggipako  
Anga chane rogini;  
Donge a·bri patalo  
Pante toreatgini.

“Mrong sotbonga re·suko  
Den·e anga childogen,  
Sigipana re·suko  
Matchu dake den·atgen.”

Pante Balseng inatjok  
    “Agre bal·ek·kunabe,  
Hai, an·chingba re·najok  
    Doen’, jik·jakkunabe.”

----

Rimrim antidamoni  
    Mande jinma re·angjok,  
Anti a·kang cha·ani  
    Uandaken bon·aijok.

Unon da·nang u’ mangba  
    Re·pilangjok songtangchi --  
Doenangmung Balsengba  
    Songtang Dingram Gitokchi.

Dingram Gitok songona  
    U’ mang soknasiosa,  
Nikdikejok ga·dapna  
    Dake Norindikosa.

Norindikde me·chikde --  
    Balsengmangko niksoe,  
Ramao turomromsoe  
    Dongjok sia daksoe.

Balseng aro Doenang  
    Dildilgokgok kenaha,  
Maiko dakgen uamang  
    Gisik chanchibeaha.

“Maina uamang ramao  
    Manggisiko nikode --  
Namjawakon ja·mano  
    Uamangko potode.”

Ine u’ mang chanchijok  
    A·seloni jokpana:  
Adi’ chel·e niwatjok  
    Name tale ma·sina.

Doenangde pantede  
    Bebera-na man·jaha,  
Bal·ek-jongkaigipade  
    Mingsa dake niaha.

Bolgongoni jong·suko  
    Doen' mangsa rim·bajok,  
Norindikni gitoko  
    Wate uko malatjok.

Chake chake nioba  
    Norin' chakna man·jaha,  
Nama dake dongoba  
    Ka·jikakon amjaha.

Adi dikdik dongari  
    Norindikde nomilde –  
Gitok dongsiksikari  
    An·pilbajok me·chikde.

Rang·san unomitingon  
    Doenangmung Balsengde -  
Re·bagimin ramakon  
    Katpilbajok an·pile.

Norindikba me·chikba  
    Timing-timang chakate,  
Katrikangjok biaba  
    Balsengmangko ja·rike.

Balsengmangde katangjok  
    Balsri gittim ramako,  
Nipilato nikatjok  
    Norin' katrikbaengako.

Rama dakgonggeao  
    Doenangmung Balsengde,  
Rong·ma chokdeng mittino  
    Dongnurikjok bisongde.

Norindikde indiba  
Ramajoljol katangjok:  
Mamung ui·pagija  
Katbadie rikangjok.

Norindikni indake  
Katbadiangman·osa  
Doenangmung Balsengde  
Katbikpiljok ja·mansa.

Uandake katbajok  
Re·bagimin ramako,  
Indakesa sokbajok  
Songtang Dingram Gitoko'.

Dingram Gitok songona  
U'mang sokbapilaha,  
Songsonganti gimikna  
Katta-kobor wataha.

“Me·gam bobil dingode  
Warachakna taribo,  
Mikkang antin' salode  
Silchidare kebabo.”

Indingipa kattako  
Songna watrikrikatjok,  
Pilak dakna nangako  
Gisik-seng·e daksojok.

Mil·am sel·u wil·ari  
Balseng tarisoaha,  
Danil kingkang keari  
Doen' dingsusuaha.

A·rong-a·sak gimikni  
A·chik mande pilakba,  
Silchidare A·chikni  
Tarisojok u'mangba.

Mil·am sel·u dokani  
Songni A·chik kamalrang --  
Gam·chipchipjok salanti  
Songsonganti tengtangtang.

Merong-mechu tarijok  
Pilak Songni me·chikrang,  
Chira-rongchu su·atjok  
Me·chik-nomil-desarang.

Songnok gittim gimikan  
Kimkokimko a·dingjok,  
Mil·am engdingdinganin  
Silga riprapchipaijok.

Uandake tarion  
Salarikit batangjok,  
Tariako matchoton  
Antin' salba sokbajok.

---

Norindikde indake  
Ramajoljol katange,  
Sokangaha me·chikde  
Songsaona nadike.

Balsri gittim songona  
Norindikde sokangjok,  
Mande a·gitalana  
Songni mande sing·sojok.

Songni mande sing·ana  
Norin' tol·e roatjok;  
"Anga rama brangesa  
Sokbaa" ine aganjok.

Songgipinni me·chikko  
Jeba ong·bo indiba,  
Nokchaksojok Norin'ko  
Katchi-bimung sing·enba.

Nomil an·gil silana  
Chagrimgrime nitokjok,  
Mande a·gitalana  
Songni mande sing·tokjok.

Nomil gital sokana  
Songo katta jangtokjok,  
Sawamancha nipana  
Sonajingba re·bajok.

Norindikko nikeon  
Uni rokom bewalko,  
Sonajingde dikdikon  
Ui·manjok me·chikko.

Norindikba mandede  
Me·chik nitobegipa,  
Sonajingmung niode  
Uko srapsrap dakgipa.

Manden' rokom cholonko  
Ui·oba Sonajing  
Rimangaha Norinko  
Dongpachina an·tangmung.

Songsonganti gimiko  
Katta kobor watana,  
Bobil dingna nangako  
Ui·manjok bisongba.

Sonajingba chanchijok  
Dinggrikramchi ropana,  
Kengenoba sikipajok  
Dinggrikako nipana.

Uni gimin Sonajing  
Norindikko ku·mongjok  
Re·pachina an·tangmung  
Tarichina aganjok.



Me·asani gandingko  
Gane-chine niaha,  
Kini tom·a kosako  
Kotip kadawilaha.

Sel·u pongterakako  
Jako jakbitangpajok,  
Danil cheng·tapkalako  
Sakginian ketokjok.

Uandak : tarion  
Sonajingmung Norinko,  
Pante chadambe gitan  
Nikangaijok bisongko.

Norindikmung Sonajing  
Balsrigittim songoni,  
Ka·dongari ta·dingding  
Re·bapaengjok sakgini.

Norindik :- Aiao, Sona` an·chingde  
Maiko dakgen na·ara ?  
Me·asarang nikode  
Bachi katgen an·chinga ?

Sonajing :- Ui·ode an·chingko  
Songchi-nokchi re·pilgen,  
Me·asarang mikkango  
Ku·ma dake mesokgen.

Norin :- Indiode Sona-ne  
Na·a ku·ma dakbone,  
Anga an·tang indide  
Jara nagok daknane.

Sona :- Oe, bebe, nanggomo  
Jeja nang·ni kattako,  
Sawa sing·gen an·chingko  
Ku·ma-nagokrarako.

Norin :- Indioba an·chingba  
Maibakode dakpana –  
Dinggrikpana changjaoba  
Maiba kamchi dakchakna.

Sona :- Oe, Norin, an·chingba  
Maikobade dakpana:  
Dakgrikpana man·jaoba  
Song·e·chane on·pana.

Unomiting somoion  
Doenangmung Balsengba,  
Dingram-Gitok ramakon  
Re·baengaha hisongba.

Songsonganti gimikni  
Pilak A·chik mandeba.  
Jang·ki·doga gimikni  
Darang pante gachiba.

Sipai jak·jinma gita  
Ruechinchin tom·bajok,  
Awawe mala gita  
Warekdimdim webajok.

Mil·am seppi keari  
“Hiho·hiho” inchrojok;  
Inchroani gam·ani  
Biri rong·kuchakpiljok.

Ja·an’ birang gam·ani  
A·bigilan mopiljok,  
Matburungrang burungni  
Kene katsoarijok.

Jara-goka dakako  
Merong oltimatbajok,  
Pante bilsokgijako  
Song·timatna rimbajok.

Me·chik desararako  
Songo-noko donbajok,  
Budeparang jimako  
Songo dongtimatsojok.

Chalang rakgiparanga  
Raka Dingcheng, Basucheng,  
Dakgrikdiligiparanga  
Rong-dotpa aro Balseng.

Uandake re·baon –  
Sonajingmung Norindik,  
Gronggrikejok ramaon  
Uamangko deldikdik.

Sonajingde rang·sanan  
Ku·ma changa dakaha,  
Norindikba Bakbakan  
Kala-nagok dakaha.

Gaku-gaku dakari  
Ku·gap-mikjapgrikaha,  
Jakchi dakmesokari  
Agangrika dakaha.

Indioba Balsengde  
Pante gisik seng·gipa;  
Chanchichipjok biade  
Gisik mikasalgipa.

An·tangtangko dakjee  
Ku·ma-nagok dakgipa –  
Gipin ong·ja bisongde  
Sonajingmung Norinsa.

Indi ine potchipjok,  
Da·nang pante Balsengde;  
Indioba jrip-dongjok  
Agangija ukode.

Doenangde indiba  
Uko ui·pajachim,  
Saoba panterang 'nesa  
Uamangko inachim.

Doenang :- Nipa', O, mama Balseng  
Baoni pante sakgini –  
Namnambea ro·rengreng  
Da·nang baoni songoni.

Balseng :- Pante namnambeoba  
U'mang ku·ma-nagoksa,  
Dakgrikpana changjaoba  
Namgen song·tim-chantimna.

Doen :- Song·tim-chantingenoba  
Agangrikna man·dikgen,  
Jeba ong·bo indiba  
Ka·dingatna namaigen.

Balseng :- Doen' na·a u'mangko  
Nirokpabo gisepo;  
Dakgrikoba bobilko  
U'mangnaba simsakbo.

Doen :- Dakgrikramni a·bao  
Simsakchana nangode,  
Watatpilbo u'mangko  
Songtangtangchi indide.

Bal :- Nagok-nating ku·mako  
Maniatna man·ode,  
Watatpilbo u'mangko  
Na·a an·tang indide.

Doen :- Jeba ong·bo ukoba  
Anga dake nikugen,  
Bobil nirikkioba  
Dakmikako ui·gen.

---

Unon pilak manderang  
Warekdimdim tom·bajok  
Mingsinggipa matgrikrang  
Antidam'na sokbajok.

Balseng aro Doen'ba  
A·damona sokbajok,  
Ku·ma-nagok bisongba  
Ja·man ja·rikbapajok.

Apalgipa antidam  
Manderara gaptokjok,  
Mande gitcham dinggrikram  
Il·ilgimgim a·dingjok.

Dakgrikrakgiparangba  
Balsengkosa nisengjok,  
Chalang rakgiparangba  
Bionasa timoljok.

Maina da·nang Balsengsa  
Me·gam rakgipakoba –  
Ja·tong pe·jok biasa  
Jinma amgijakoba.

Chalang rakgiparangba  
Uni gimin re·bajok,  
Maiko dakgen sing·pana  
Balsengona timoljok.

Mingsinggipa Rong·dotpa  
Re·bae nijok miktenten,  
Dinggrik-dakgrirakgipa  
Dingcheng aro Basucheng.

A·chikrangni matgrikrang  
Unon pante Balsengko –  
Chalang songjok jinmarang  
Dakgrikdilna bobilko.

A·a bigil mopile  
Chalang songe inchrojok,  
Kadesilko ganate  
Rasong-mikkim de·atjok.

Dakgrikdiligiparangko  
Biap a·dok suale,  
Donataha u'mangko  
Pante Balseng pakwate.

Basucheng rakgipako –  
Dolsa manderang baksa –  
Dingram Gitok a·doko  
Donataha dingsona.

Ua biap a·dokan  
Bobil-ginal napbaram –  
A·dok silang cholsasan  
Bobil-dinggrik-dakgrikram.

A·dok silang kosako  
Rong·ma rong·te jinmako –  
Tarisojok cholrangko  
Rompedapna bobilko.

Matgrik Rong·dotpakoa  
Samtangtangni dolrangko,  
Dakgrikdilna donatjok  
Chisam a·pal bijolo.

Dingcheng Dal·gipakoa  
Re·bikpile chagropna,  
Donataha bikoa  
Dimbrasini ramana.

Kobor-katta watgrikna  
A·bri-a·chu kosako,  
Wal·ang riprapatchina  
Aganatjok pilakko.

Mande ma·sigijako  
Name sing·rokchengchina,  
Aganatjok pilakko  
A·ko chike jokchina.

A·ko chikna changjaode  
Je mandeba ong·china,  
Dinggrikramni a·baode  
Uko den·e galchina.

Uandake kamtango  
Pante Balseng matchotjok,  
Bobil dan·grikaniko  
Simsaksoe tarijok.

Pante Balseng an·tangde  
Pilak dakgrikaniko –  
Dilna ine mangsonge  
Dongjok a·dam jatchio.

Balseng da·nang rimbitjok,  
Doen'kode an·tangna  
Salo biko tuatjok  
Walo walmikrakchina.

Sonajingba Norinko  
Salo tusiatpajok,  
Walo walo an·tango  
Nitimchina donpajok.

Uandake sengsojok  
Sal-somoiko dakgrikna,  
Kinasalan antijok  
Bobil warachaksona.

Anti a·dam samtangtang –  
Dingram Gitok bijolo –  
Tarisojok paltangtang  
Donge a·tiptangtango.

Wekwakchipchip manderang  
Jripjrang dongnutokaha:  
Ritcha-hajal kotokrang  
Niwatato nikjaha.

Antin' salde batangjok,  
Bobil nape re-baan sal;  
Nisooba nikjajok  
Bobilrangko salni sal.

Pante Balseng indiba  
Mikraksoe dongaha:  
Pilak kotokrangkoba  
Apsan simsakataha.

Salantian indake  
Bobil nichaksoaha,  
Merong-mechu dandake  
Cha-e-ringe roaha.

Sol-na-repna changgipa  
Bolko bimang sol-aha;  
Watna-chengna sapgipa  
Do-kru-do-sing sepaha.

Agan' rojok kattako –  
Walo-walmikrakhgipa,  
Raka Dikki Rajako –  
A-chik katta man-gipa.

Pante engengmitingrang  
Dakgriksusae roaha,  
Etal-mangkalgiparang  
Ka-dingate roaha.

Dakgrikramni a-damo  
Uandake rotokjok,  
Nichaksoe bobilko  
Salarikit re-atjok.



Sonajingmung Norin'de  
Indakmiting somoio,  
Re·angaha bisongde  
Aue rona chibimao.

Me·chikrara sikdikdik –  
Chikong rong·ma mittino,  
Sonajingmung Norindik  
Aue rojok chibimao.

Doenangba panteba  
Tiktak ua somoio –  
Re·angha biaba  
Auna inc chibimao.

Me·chik' ku·rang knaana,  
Doenangba re·bajok,  
Auram chikong sambaona  
Re·bae time niatjok.

Da·nang Doen' unosa  
Ui·aha u'mangko,  
Sonajingmung Norin'sa  
Dakjeange bimangko.

Sonajingmung Norin'-ni  
Me·asani gandingko  
Doen' da·nang cha·ujok  
Chirikamo donako.

Cha·uemung donnujok  
Samdim-boldim mitino,  
Doen' kenjagokatjok  
Sonajingmung Norinko.

Kenjagoke katangjok  
Sonajingmung Norindik,  
Niwil-nipilangajok  
To·tro ong·e rang·gitik.

Sonajingde songtangchi  
Ramajoljol katangjok,  
Norin'kode janggilchi  
Doen' da·nang salrikjok.

Gana sosichopchope  
Kene be·en moaha –  
Nisingchakna pa·jae  
Norin' bamchikkopaha.

Doenangde Norin'ko  
Da·nang mikchae·namnike,  
Aganaha kattako  
Rinok·rinok malmoke.

Doenang :- Wai, na·ara, kemane  
Gipin ong·ja angasa,  
Da·a kena Norin'·ne  
Anga pante Doen'sa.

” :- On·ti golpo ka·kuna –  
Namnikgenma ang'ka·saa;  
Gisik ka·srokatkuna  
Nang·ko nike dikdiksa.

Norindik :- Atcho, watbo, wakbipa  
Duga seng·a daknabe –

Doenang:- Jeba ong·bo indiba  
Achak·wakde solnabe.

Doen :- Ha, gangenma Norindik,  
(Kotiptang- Na·a kiratcha·aode –  
ko on·e) Dongnok anga mikkimit  
Na·a gansrenakode.

Doen :- Sosichopchop dongode  
Na·a bikma sa·dikgen,  
Ba·ra chisepja·ode  
Sin·a nape sakamgen.

Unon da·nang Norindik  
Janggil-ite gansrejok,  
Gansreman·o joljolbik  
Rang·san katna daktaijok.

Doenangba niari  
Nikja dake dongmikjok,  
Bolcheksiko pe·ari  
Rang·san ganao bingrikjok.

Doenang :- Angni kotip ba·rako  
Na·a gane katode,  
Mitakjawama nang·ko  
Songni mande nikode ?

Norin :- Doen', gata, denggusrang,  
Maina nachil-akbea ?  
Na·an da·nang namjasrang  
Agre duga tol·bea.

" :- Maiko dake indide  
Songchi-nokchi re·pilgen ?  
Ui·jajok angade  
Me·chik maiko dakpagen ?

Doen :- Nang·ni gana ba·rako  
Sepe uko ramatbo,  
Uko gane ran·joko  
Songchi-nokchi re·angbo.

" :- Dikdik golpo ka·kuna  
Asong' ia rong·teo --  
Anga milsi pikuna  
Cha·na intang attamo.

Norin :- Na·tok milsi piam  
Intang atam cha·pana ?  
Me·chik milsi jikama  
An·tang chame ra·pana ?

- Doen :- Man·paode cha·pana  
Na·tok milsi piachim,  
Namnikode ra·pana  
Nang·ko chame ingenchim.
- Norin :- Na·atangtang inaibo  
Kore pagila gita;
- Deon :- Indiode am·angbo  
Me·chik nopalap gita.
- Norin :- Ia a·gilsakode  
Agan' saoba dongama ?  
Me·chikrangni changode  
Pante gisik nom·jama.
- Doen :- Atcha, Norin' indide –  
Na·a sako mikchara -?  
Agan' angna ka·sine  
Na·a sana ka·sara ?
- Norin :- Angni an·tang mikchaade  
Nangni mama Balsengko;  
Tange-name dongode  
Man·gen anga panteko.
- Doen :- Oe, namgen man·ode  
Anga kusi ong·begen,  
Indioba Balsengde  
Ramram man·na neng·begen.
- ” :- Indakesa me·chikrang  
Rinok-rinok malmoka,  
Ja·manode uamang  
Ong·si-ong·dang man·dika.
- Norin :- Man·dikoba angasa  
Na·a man·dikpagenma ?  
Angko an·tang mikchaesa  
Rokom-rokom tol·ama ?

- Doen :- An·tang mikchabatako  
                     Ramram man·ja a·sako,  
 Man·genoba jorako  
                     Ma·gapjawa gisiko.
- Doen :- Me·chik mikchagenoba  
                     Pante ka·sanapjaode,  
 Jora·ripeng ong·oba  
                     Bon·changjawa dukrangde.
- Norin :- Pante ka·tong rakoba  
                     Me·chik ku·chimitode,  
 Ka·sanapgen indiba  
                     An·saoatna changsade.
- Doen :- Pilak an·saoanirang  
                     Me·chik rongching·mitingo,  
 Nikrangrani ka·saarang  
                     Balgaojawa ja·mano.
- ” :- Me·chik ka·sanapoba  
                     Pante ka·sanapjaode;  
 Maiba cholchi man·oba  
                     Dongkamjawa ka·saade.
- Norin :- Ka·sanapman·chaode –  
                     Anga pante Balsengna,  
 Sakgipinko ra·oba  
                     Man·kugenma kusina.
- Doen :- Na·a an·tang man·oba  
                     Da·nang mama Balsengko;  
 An·senggenma unoba  
                     Ka·sajaode me·chikko ?
- ” :- Uandake angaba  
                     Nang·na ka·sanapman·e,  
 Sakgipinko ra·oba  
                     Ong·jawane kuside.

- ” :- Indakesa manderang  
Bang·an dukko man·toka,  
Chanchigijagiparang  
Jora ra·gualtoka.
- Norin :- Indioba angade  
Balsengkode watjawa;  
Anga an·tang man·jaode  
Sakgipinna on·jawa.
- Doen :- Sakgipinna on·gija  
Maiko dakgen na·ara ?  
An·tangkode nigija  
Maina ramram mikchara ?
- Norin :- Anga mamung dakjawa --  
Nang’ mamako Balsengko:  
Indioba watjawa  
Jotton ka·gen panteko.
- Norin :- Man·na sike panteko  
Mamung a·jak sokjawa,  
Sonajingko me·chikko  
Anga bobil dakjawa.
- Doen :- Na·a bobil dakjaoba  
Sonajingko me·chikko,  
Nampinika dakoba  
Bobil ong·gen ja·mano.
- Norin :- Anga bobil dakoba  
Jawa gipin nomilko,  
Maiba cholchi man·oba  
Suk-ong·jawa a·sako.
- Doen :- Na·a an·tang saksasan  
Uandake ong·jawa,  
Sonajingmung Balsengban  
Kusinirang dongjawa.

Doen :- Aro anga an·tangba –  
Kakket agansrangode –  
Dukko man·gen indiba  
Norin' nang·ko man·jaode.

Doen :- Uni gimin a·sako  
Tomtom kusi ong·nade  
Saoba saksa an·tangko  
Tariosa on·kange.

Norin :- Bikpil·bawil chanchina  
Da·o chanchisokkuja,  
Anga badi inpana  
Me·chik mande ui·ja.

Norin :- Jeba ong·bo Doenang  
Hai, an·chingba re·najok;  
Intang walo jajumang  
An·ching golpo ka·bejok.

Norin :- Aiao, Doen', bachijok –  
Angni gana ba·rara - ?  
Niwilwalo nikjajok  
Rong·tesako ramara ?

Golpo ka·grikmitingo  
Doen' aro Norindik,  
Simakkujamitingo  
Balwa baljok rang·gitik.

Rong·tesako ramako  
Balwa balpakangaha,  
Norindikni ganako  
Chio man·pakangaha.

Am·e·am·e nioba  
Ba·rakode man·jajok,  
Chikonjoljol nioba  
Ganakode nikjajok.

Norin :- Doen` na·a an·tangsa  
 Denggu dake roakon –  
 Jawa ka·dingchinasa  
 Ang` ganako galakon ?

Doen :- Aiao, na·a Norindik –  
 Anga maina galpagen ?  
 Nang` mikkangon salgimik  
 Maikai galna man·pagen ?

Doen :- Nang·ni gana ramara  
 Nang` janggalchi rong·tcon.  
 Galatode na·asa  
 An·tang uko galakon.

Norin :- An·tang gana ramako  
 Anga maina donugen ?  
 Nampajaoba barako  
 Sawa jari galatgen ?

Doen :- Ang` kotipko ganangna  
 Ba·ratangko galama ?  
 Golpo ka·e rokuna  
 Na·an denggu dakama ?

Norin :- Agan` bakbak Doenang  
 Anga maiko dakginok ?

Doen :- Oe, bebemo, da·nang  
 Ang` kotipko on·bojok.

Indi ine ka·dinge  
 Doen` ga·soltapaha,  
 Rong·te ga·ringrengman·e  
 Pante ga·akangaha.

Unomiting somoion  
 Norindikde katangjok,  
 Doenangni kotipkon  
 Gane katjoljolangjok.



Ja·keng ja·keng dakari  
Doen saksan re·bajok;  
Dingram anti a·damchi  
Re·bapile sokbajok.

---

Sonajingde songtangchi  
Saksan katjoljolangjok,  
Songtang Balsrigittimchi  
Da·nang sokangpiltaijok.

Noktangona sokange  
Ba ra·kancha gansrejok,  
Norindikko sengsoe  
Nisooba nik·jajok.

Uni gimin Sonajing  
Am·na ine Norin·ko,  
Re·pilbajok ta·dingding  
Balsrigittim ramako.

Uandake sokbajok  
Norindikko sandie:  
Niroroe am·bajok  
Samdim·boldim napsike.

Unonchacha somoio  
Da·nang pante Balsengba,  
Am·na ine Doen·ko  
Re·bapaengjok biaba.

Ramajoljol re·bae  
Rama samtangtangchiko,  
Nirorojok am·bae  
Balseng da·nang Doen·ko.

Uandaken am·baon  
Balseng ramajolgimik,  
Nikjok boldim nalsaon  
Sonajingko deldikdik.

Sonajingde rang·gitik  
Balsengkosa nikdike:  
An·pilenba deldikdik  
Dongjok ka·dingsimite.

Balseng :- Aiao, na·a Sonasa  
Banonisa nakata ?  
Ka·saan' jagring mainasa  
Jumang gita mesoka ?

Bal :- Ian nikjagringsama  
Jagring maiko tang·dape ?

Sona :- Na·an sima niama  
Nikna gisik ra·mane ?

Bal :- Bachinaba re·ama –  
Maiakoba sandie;  
Angna aganpagenma  
A·selkode parake ?

Sonajing :- Ripengtangko Norinko  
Anga am·engasachim,  
Paraksrangna kattako  
Kiratcha·engasachim.

Bal :- Ku·ma·nagok dakmike  
Bimang dakjeaniko,  
Galahama nidike  
Me·asani gandingko ?

Sona :- Aiao, da·nang, na·ade  
Gisiksale seng·dangdang,  
Dakmikpaoba angkode  
Nikataia jojrangrang.

Bal :- Agan' Sona', indide –  
Maina angko togia ?  
Me·chik·desa mandede  
Maina bimang dakjea ?

- Sona :- Dakgrikramni a·bao  
Nang·ko nikna sikesa,  
Maiba dukni somoio  
Dakchakpana inesa.
- Bal :- Dakchakpana inode –  
Beben, namjok ka·sara –  
Angko na·a indide  
Maina wate katbara ?
- Bal :- Dakgrikramni a·bao  
Me·chik balwa ringama ?  
Ong·jaoba gisiko  
Maiba chanchinapama ?
- Sona :- Pante na·a an·tangan  
Maiba chanchinapama ?  
Chingni auako na·an  
Chingko kenatgipama ?
- Sona :- Amitade ong·jane  
Pante kema ka·genma ?  
Norindikko miksonge  
Na·an sikrigipama ?
- Bal :- Aiao, Sona', da·alde  
Angko nachil akama ?  
Nang·mung Doen' indide  
Dingtang a·te roama ?
- Sona :- Cheche, pante, ong·jane –  
Nang·ko amitkujachim,  
Nachil akengasane  
Pante kema ka·bochim.
- Bal :- Jeba ong·bo indide –  
Dikdik balwa ringkuna –  
Nang·ni nachil akode  
Norindikmung rokuna.

- Sona :- Inghing, ong·ja, watjawa,  
(Rama Anga etalasane,  
champenge) Nang·ko nachil akjawa  
Ka·sapae kemane.
- Bal :- Nachil aka kattana  
Maina kema bi·enga ?
- Sona :- Nang' gisikko ninasa  
Anga tamin-dakenga.
- Bal :- Nang·ni nachil akako  
Ang' gisiko ui·a,  
Nina nang·ni gisikko  
Katmikasa dakaia.
- Sona :- Pante, angna aganbo,  
Amitani a·selko –  
Donugija parakbo  
Angnamangmang da·alo.
- Bal :- Amitgipa mandede –  
Me·asaba me·chikba –  
Maiba mingsasikchide  
Ong·siani donggipa.
- Bal :- Manden' bimang kam-gisik  
Dimelode ka·sara –  
Basakoba rang·gitik  
Dingtang gisik chanchia.
- Sona :- Mikkang-bimang me·chikni  
Da·nang rongdimeloba,  
Bala bibal ka·saani  
Dimelgija pangnaba.
- Sona :- Ka·saan' bibal balode  
Bimang rongdimeloba,  
An·pilbagen changsade  
Sakgipinko nikoba.

- Bal** :- Ka·saan' bibal ge·gipa  
Me·chik ka·saan' bario  
Me·asara gamgipa  
Ka·saan' bibal bario.
- Sona** :- Ninamgija bibalko  
Saoba me·chik ge·ode,  
Balgaogenma bario  
Nitoriri changsade ?
- Bal** :- Uni gimin ge·songgen  
Saoba gipin bibalko,  
Unon gisik mikbu·gen  
Jawa ge·songgipako.
- Bal** :- Indakesa amita  
An·tangtangni a·selo,  
An·tang' dosko bobita  
Nikja dake janggilo.
- Sona** :- Aiao, pante, an·chingde  
Me·tra-pante ong·ari;  
Golpoenga indake  
Ka·sagrika dakari.
- Bal** :- Me·tra-pante ong·oba  
Mande gisiksalode –  
Jik·sen' gisik-kamkoba  
Nanga niksamsonade.
- Sona** :- Agan' pante aroba  
Pil·e mingsa kattako:  
Ka·san' bibal nokgipa  
Bari gamrokgipako.
- Bal** :- Nitogipa bibalko  
Me·chik ge·songgenoba,  
Gamrokgipa bariko  
Changja mitam simsakna.

- Bal :- Indakgipa bibalko  
                     Saoba da·nang mikboka,  
                     Ka·saan' bibal bariko  
                     Jakma gipin gamroka.
- Bal :- Ninambata bibalko  
                     Ka·sa-ka·sa simsakna,  
                     Ka·saan' bibal bariko  
                     Nanga chiru-a·gatna.
- Sona :- Oe, bebe, nanggo mo –  
                     Rokom rokom bang·bea,  
                     Me·tra-panten' salrango  
                     Chanchisona nangbea.
- Sona :- Aro mingsa aganbo,  
                     Jik-se baseaniko:  
                     Ka·sagrikchengmitingo  
                     Me·tra-panten' gisikko.
- Bal :- Me·tra-panten' ka·sara  
                     Ka·saan' ka·tong balpaka:  
                     Ramram mikni mikchara  
                     Miko jagring riprapa.
- Bal :- Mikcha-namnikgrikoba –  
                     Me·tra-pante gisiksan,  
                     Kam-gisikko talgija  
                     Ka·saa dakmikgrikasan.
- Bal :- Ka·saa dakmiktokari  
                     Jora-ripeng ra·grika,  
                     Gisik mikmaktokari  
                     Ka·saa chadimaktoka.
- Bal :- Ka·tong ka·sagrikani  
                     Ka·saatangna on·kange,  
                     Gisik-katchi janggini  
                     Rasongona mikkange.

- Bal :- Ka·sagrikan' mikchichi  
Mikko mikandalata:  
Dukko boe janggilchi  
Jakritinge rotoka.
- Sona :- Pante na·a indide  
Gisiksalni mikkatchi –  
Ropagenma changsade  
Sukko done mikkangchi ?
- Bal :- Nang·ko done mikkango  
Rogen anga ku·chimit,  
Ning·tubata ka·tongo  
Ka·saan' bibal balrimit.
- Sona :- Ja·pang·cheksi bijime  
Ka·saan' bibal balode,  
Aram gita ka·sine  
Balpongangen dukrangde.
- Sona :- Agan' pante, aroba  
Mikcha·namnikaniko:  
Angnamangmang da·oba  
Mikjagringni kattako.
- Bal :- Mikkang bibal balgaoa –  
Miko jagring ripraper  
Balmitingo nitoa  
Jagring teng·a ra·chake.
- Bal :- Ukon minga mikchaa –  
Jagring salopgrikani,  
Nagen bimik ka·saa'  
Ka·tong bigron 'sakoni.
- Bal :- Indakgipa rokomni  
Ka·saa dikdiksana,  
Bibalenga ka·saani  
Jagring riprapana.

- Bal :- Uandake manderang  
Ka·sagrikmitingosa,  
Ka·sasretgrikgiparang  
Kusi ong·a dikdiksa.
- Sona :- Ka·sasretgenchimode  
Uko maichi parakgen ?  
Chamesaba daldale  
Ka·sasretman·ataigen.
- Bal :- Rokomari kamrangchi  
Donga dake niani,  
Parakaigen maibachi  
Ong·jaode an·tangni.
- Sona :- Joratangko man·jaode  
Janggi-tangan' ong·sia,  
Jik-se ra·nangjaode  
Dukni sagal tu·bea.
- Sona :- Maina da·nang Dakgipa  
Jora-jora dakatjok,  
Joratangko sechina  
A·gilsakna watatjok.
- Bal :- Indioba manderang  
Mikcharamramaria,  
Mikchagrikon uamang  
“Jora-ripeng” inaia.
- Sona :- Basakoba me·chikni  
Mikcha-namnikgijako,  
Mama-ada songoni  
Sing·e on·a panteko.
- Bal :- Aro basakobara  
Ra·na nanga gipinko,  
Man·pajaemung saobara  
Mikcha-namnikatangko.



- Sona :- Mitamranga indiba  
Gamsengnasa mikboke –  
Donge roa jekoba  
Gamna ka·sasuaake.
- Bal :- Basakoba mitamrang  
A·sel nangao ga·ake –  
Mikrakhijagiparang  
Dongna nanga ra·grike.
- Bal :- Da·nang uandakesa  
Jik-se ra·sretgriktoka,  
Indakemung ja·mansa  
Dukko chake rotoka.
- Bal :- Indakesa nokdango  
Tomtomgija dukrangni,  
Songo-noko, a·sako  
So·sojeng·jeng ong·ani.
- Sona :- Aiao, da·nang, gosemo –  
Ka·saan' a·gilsakode,  
'Choa gita aramo  
Man·su-man·su nikode.
- Bal :- Ringrangringrang ka·tongo  
Ka·saan' teng·sugenode,  
Nitoriri nokdango  
Dongkamgenchim ka·saade.
- Bal :- Ka·saan' bibal nokdango  
Simildingding balode,  
Song-nok songsul gimiko  
Balgaogenchim rasongde.
- Bal :- Ka·saani sagalo  
Rikrak gitchoangenga,  
Ka·tong chipakkoreo  
Sripe sinasienga.

- Sona :- Aiao, pante, na·ade  
Gisik nikjumangjokkon;  
Chanchiode indake  
Angkon gualpilgenkon.
- Sona :- Da·omiting somoio  
Bobil sokbagenode,  
Damsan an·sengmitingo  
Maiko dakgen na·ade ?
- Bal :- Ka·saan' bobil dingani –  
Jeba ong·bo dingnajok,  
Bobil warachakani  
Cholko tarisoman·jok.
- Sona :- Maina bobil dingrika  
Ka·sa·ka·sa janggina ?  
Maina janggi sigrika  
Arang-adang rasongna ?
- Bal :- Bobil dinga kattara  
'Songna ka·saanisan,  
Mandesalni ka·sara  
Ong·ja chametangnasan.
- Bal :- A·songtangko chel·chakna  
Janggitangko on·chake,  
Donjok mande sakprakna  
Ka·saan' gisik ma·ate.
- Bal :- Kakket ka·saan' kamode  
Janggi on·chakanisa –  
Janggitangna ka·saode  
Ka·saani ramramsa.
- Sona :- Indiode ong·ama  
Dingrikgipa 'songanti,  
Ka·sae chelchakgipama  
A·songtangna sakanti ?

- Bal** :- Dolsa dinggrikgipade  
Kajiako botgipa,  
'Songna chel·chakgipade  
Uko warachakgipa.
- Bal** :- Mitam a·song' nokgipa  
Rasongtangko de·dona;  
Dinggrikronga rakgipa  
'Songgipinko nisina.
- Sona** :- Na·simangni Me·gamko  
Dingna tarisoara,  
Agan' maia a·selo  
Warachaksoengara ?
- Bal** :- Bobil dingna Me·gamrang  
Songga·bate napode,  
Tarisoe A·chikrang  
Nanggen warachaknade.
- Bal** :- A·sel uandakgipa  
A·songona sokode,  
Kajiako botgipa  
Ong·ja uandakgipa.
- Bal** :- Jatna sachaknakode  
Mande gisik seng·osa,  
'Songko chel·chaknakode  
An·tang on·kangchengosa.
- Sona** :- Ramram bobil dinggipa  
Ka·namgijagipama?  
Kajiako botgipa  
A·song bilakgipama?
- Bal** :- Kajiako botari  
Bobil dinggrikchenggipa,  
Mingnamgipa a·sel gri  
Bote ra·tinggelgipa.

- Bal :- Uko warachakgipa –  
Janggitangko on·chake,  
Ka·san bilchi chegipa  
A·songtangko gipake.
- Sona :- Indakgipa pantede –  
Janggitangko galeba,  
Kakket ong·gen binide  
Ka·saa chametangnaba.
- Bal :- Amatangna ka·saaode  
A·songtangko chel·chakgen,  
A·songtangna siode  
Janggi be·en pil·taigen.
- Sona :- A·songtangna ka·saode  
Janggitangko galgenma?  
Chametangna siode  
Janggi maiba pil·genma?
- Bal :- Chametangna siode  
Bon·gen be·en-bikapsa,  
Ka·saan' beri delode  
Janggi pil·gen chamesa.
- Sona :- Anga uni giminsa  
Dakgrikramchi roachim,  
Sio damsan inesa  
Nang·ko katrikbapachim.
- Bal :- Aiao, na·ade, Sonade  
Gisik Mitesaknisa,  
Ka·saani waride  
Tu·a rikrakrikraksa.
- Sona :- Ka·saani wario  
Janggirara balbogen,  
Wala do·gisikjoko  
Pil·e janggi mikrakgen.

**Bal** :- **Janggi-silchi rakgipa**  
Be·en baksa cham·jawa-  
**Baljanggichi sikgipa'**  
**Sia mangkimajawa.**

**Sona** :- **Janggi sikgen bimango**  
Bimik mikbreta gita,  
Do·gisika paksao  
Pringprang nabaa gita.

**Bal** :- **Gisik-ka·tong janggide**  
Salgisaknirarasa –  
Gun-gisikni pangmade  
Nama janggi-silchisa.

\*\*\*\*\*

(Uochacha somoio  
Dinggrikramchi jikjakjok,  
'Biri kosak **patalo**  
Nagirako dokatjok.

Sonajingmung Balsengde-  
Rang·san niwilwalaha,  
**Jaja-jiji dakenba**  
Deldik an·piltokaha. )

\*\*\*\*\*

**Sona** :- **Rada, na·a maiasai**  
Bobil sokbaengjokma?

**Bal** :- **Da·o maiko dak'noksai**  
Nang·ko watangnajokma?

**Sona** :- **Maina saksan watanggen**  
Angko a·bimanduo-  
Ang'ba nangmung re·pagen  
Sina a·dam damsano.

Bal        :-        Sina-tangna inoba-  
                      Me·chik mande inode,  
                      Duk-sukoba indiba  
                      Dongbo songo-nokode.

Bal        :-        Angni Sona' Rongjanggi  
                      Hai, mo, re·bo songtangchi;  
                      Anga dilgen jaktangchi  
                      Nang·ko Balsrigittimchi.

\*\*\*\*\*

( Indi ine agane  
      Jako rim·e salangjok,  
      Sonajingko Balsengde  
      Songtangchina dilangjok.

Katang-re·ang dakange  
      Balsrigittim sokangjok,  
      Ka·sariri ekgrike  
      Sonajingko watbajok. )

\*\*\*\*\*

Bal        :-        Sona' na·a dongbone  
                      Sona ronggrika gita-  
                      Angko gualkubone  
                      Dikdik jumango gita.

Sona     :-        Pante, bachi katnaka –  
                      Walni jumango gita?  
                      Ang'ba nang·mung sinaka  
                      Janggi sikrima gita.

Bal        :-        Angni Sona Rongsila  
(Chel·angroroe)     Dongbo songna ching·chete,  
                      Angko maina nipila  
                      Ka·sa·ka·sa nitate ?

Sona :- Angni Pante Baljanggi  
(Chadolko Balwa gita rakbone –  
wingwange) Pante birong mikjanggi  
Bakbak re·bapilbone.

Bal :- Sona Ripokdo·katchi –  
(Milamko Na·a dongrikbojokne,  
ku·dime) Ka·pakoba mil·amchi  
Ka·sa·ka·sa salamne.

Sona :- Rasong ‘sakna namchina  
(Bibalko Bale ka·saan ka·tongo,  
ake galate) Pattiani ong·china  
Nang·na ia bibalo.

Sona :- Salaramni Rasongchi  
(Jaktangko Pante na·a chebone;  
Ku·dime) Ku·dimenba ka·saachi  
Mikchi baksa salamne.

.....

Mikchi baksa ekgrikon  
Ka·sri·ka·sri chel·angjok,  
Pantekode dikdikon  
Nirikoba nikjajok.

Mil·am riprapangako  
Chrichrao nikrikarijok,  
Ja·birangni gam·ako  
Kinarikmangmangaijok.

\*\*\*\*\*

# **SONAJING**

## **(Ka·saan' Git)**

### **BAK – III**

1. Ta·rakgipa balbima  
Rang·san sokbaa gita  
Sokgen bobil songona  
Songko nisina gita.
2. Balbimani balode  
Kenbegini ong·bea,  
Balminduri sikode  
Jajrengsona nangbea.
3. Bobil ginal sokode  
Basakoba a·songna  
Bata chanchiatode  
Ta·rakgipa balwana.
4. Indioba a·songo  
Saksa donggen changsao  
Naljokatna songtangko  
Warachake bobilko.
5. Pante Balseng indake  
Gisiktango chanchijok,  
A·songtangna ka·donge  
Bobil dingna chakatjok.
6. Riprap riprap mil·lamko  
Jako endingdingari  
Pante matgrik bobilko  
Dingna nijojoari.
7. Balseng da·nang chabajok  
Do·sing bilpaka gita,  
Bobilrangko sandijok  
Wachi roenga gita.



8. Joljol-bikbik chabaemung  
Deldik chadengdikaha,  
Bolchi gadoangeming  
Bobil' niwatataha.
9. Bolrikeo gadoe  
Niwatatjok pilakko –  
Dingtangmancha miksonge  
Dakgrikramni a·bako.
10. Niwataton nikatjok  
Dakgrik-dinggrikengako -  
Nike arao inmanjok  
Warekdimdim bobilko.
11. Uni gimin ong·onjok  
Balseng da nang boloni,  
Jol·jol-bikbik chabajok  
Dakgrikramchi unoni.
12. Uandake re·baon  
Dakgrikramni ramako  
Grongjok Balseng dikdikon  
Songni sakgni mandeko.
13. Indioba nikenba  
Uamangni gandingko  
Balseng da·nang dikdiksa  
Jadip changjok gisiko.
14. Maina da·nang u'manga  
Megam gandingrangkosa  
A·chik mande ong·oba  
Ganengachim dakmikna.
15. Uni gimin sing·aha  
Pante Balseng u'mango,  
Bakbak aganchakchina  
Dakmikani a·selko.

16. Rang·rangari sing·aha  
Ka·o nange gisiko  
Mil·lam engdingdingaha  
Aganchina bebeko.
17. Be·en moe kenaha  
Da·nang u'mang sakgini,  
Jama janggi dongjaha  
Salba maiko dakgini.
18. Jeba ong·bo indiba  
Kengenoba gisiko –  
U'mang kema bi·enba  
Aganaha bebeko.
19. U'mang jakko chopjole  
Kattarangko aganjok,  
Kena ginang bamgope  
Indi ine aganjok.

**(A·chik Me·gam  
Dakgipa saksa)**

20. “Bobil” nisoo arate  
Dakgrikramni a·bao –  
Dakgriksusaa dakate  
Rojok A·chikrarako.
21. “Chanchidiljok Rong·dotpa  
Challang saksa cheng·rengreng-  
Dinggrik-dakgrikdiligipa  
Dimcheng aro Basucheng.
22. “Ra·rongrike sualjok  
A·chikrangko dolgini –  
Mikrakate aganjok  
Dakmikako u'mangni.

23.    **“A·chikrangni dolsako  
Me·gam ganding ganate –  
Dakgrikatjok u’ mangko  
Dakgriksusaa dakate.**
24.    **“Uandake A·chikrang  
Dolsa Me·gam dakaha,  
A·chikrara an·tangtang  
Dakgriksusae roaha.**
25.    **“Indakmiting somoio  
Bobil’ nisogiparang  
Dakgriksusamitingo  
Niksojajok uamang.**
26.    **“Unochacha somoio  
Nengrarasa Me·gamrang –  
Dingram Gitok A·dokko  
Napbatokjok bobilrang.**
27.    **“Uandake napbaesa  
Bobilrangde sokbajok,  
Me·gam dakgipamingsa  
Uamangde napsepjok.**
28.    **“A·chik Me·gam gandingko  
Gangipamung dongsepe,  
Dingjok pilak A·chikko  
Me·gamrangde chadrape.**
29.    **“Da·nang uandakesa  
Me·gamranga dikdikon  
Dingjok A·chikrangkosa  
U’ mang ma·sikujaon.**
30.    **“A·chikrangde unosa  
Bobil napjok inemung,  
Dokjok nagirakosa  
Jagok-jabrangarimung.**

31.     **landake agane**  
           **On·jok u'mang Balsengna,**  
           **Kirat cha·e bamgope**  
           **Pa·tokjajok nichaona.**
  
32.     **A·sel ong·a gimikko**  
           **Balseng da·nang kinajok,**  
           **Dakna nanga kamtangko**  
           **Rang·san ua chanchijok.**
  
33.     **Songchi kobor on·china**  
           **U'mangkode watatjok,**  
           **Simsaksoe dongchina**  
           **Balseng ku·pattiatjok.**
  
34.     **Indakemung Balsengde**  
           **U'mang' Me·gam gandingko**  
           **Ganrikaha ra·rike**  
           **Me·gam dakna an·tangko.**
  
35.     **Ua Me·gam gandingko**  
           **Pante gane nipajok,**  
           **Unon da·nang Balsengko**  
           **Me·gam atchrak nikaijok.**
  
36.     **Unon Balseng ta·rake**  
           **Dakgrikramchi chabajok,**  
           **Me·gam gita tarie**  
           **Dakgrikram' na sokbajok.**
  
37.     **Uandake sokbaesa**  
           **Nikjok Balseng u'mangko –**  
           **Bilding-bildang dakesa**  
           **Dakgrik-dinggrikengako.**
  
38.     **Unon Balseng an·tangba**  
           **Me·gam dolo nappajok,**  
           **Bobilrangmung dongesa**  
           **A·chikrangko sandijok.**

39. Me·gam ganding gangipa  
A·chikrangde chanchijok  
Gipin ong·ja Balsengsa  
Ine u'mang ma·sijok.

40. Jol·jol-bikbik Balsengde  
Rang·san inwatataha,  
Dakgrikani indake  
Ong·kujaenga inaha.

41. Me·gam ganding ganari  
Jitchiona ong·katjok,  
Balseng jakko songari  
Indake aganjok.

*Balseng:*

42. “Bilding-bildang ong·aha  
Dakgrikako dontongbo –  
Dakmikarang bang·aha  
Name a·bachengtaibo.

43. “Maina dolsa A·chikrang  
Me·gam dake togijok,  
Me·gamrangba an·tangtang  
Cha·uesa napbajok.

44. “Niatchimbo angkoba  
Me·gam ganding ganako  
Sandichengna inenba  
Angni A·chik dolrangko.

45. Indi ine parakjok  
Balseng da·nang an·tangko,  
Gandapako okgaljok  
Me·gam ganding ganako.

46. Indakemung aganjok  
Me·gam dakgiparangko  
Tomdakchina ge·etjok  
A·damsano u'mangko.

47.    Me·gam ganding gangipa  
          A·chikrangba re·bajok,  
          Me·gam dake rogipa  
          A·chik dolmung tom·dakjok.
  
48.    Unikoa u'mangko  
          Okgalchina aganjok,  
          Pilak Me·gam gandingko  
          Galtokchina ge·etjok.
  
49.    Ge·etana Balseng-ni  
          U'mang okgaltokaha,  
          Gandingkosa A·chikni  
          Da·nang dontokaiaha.
  
50.    Da·nang uandakesa  
          U'mang A·chik pil·tokjok,  
          Me·gamrangde unosa  
          Jadip-mikmak changaijok.
  
51.    A·chikrara indake  
          Warekdimdim tom·aha  
          Bobil dingna ka·donge  
          U'mang taritokaha.
  
52.    Rong·dotpa aro Balseng  
          Dakgrikdilna tarijok,  
          Dingcheng aro Basucheng  
          Matgrikrara chadengjok.
  
53.    Me·gam kotok bobilrang  
          Donge mikkang chakao  
          Jikjak-jikjak uamang  
          Dakgrikramni a·bao.
  
54.    Me·gam dolni matgrikrang  
          An·pachake dangpajok,  
          Raka Me·gam Gonggrot-mung  
          Dakgrikpana tarijok.

55. Uandake dakgrikna  
U'mang taritokaha,  
Me·gamrangde indiba  
Da·nang kena napaha.
56. Maina u'mang u-ijok  
A·chik gisik matgrikko  
Mangsongako ma·sijok  
U'mang Me·gam dakako.
57. Unikoa Balseng-de  
Mikkangona re·bajok,  
Inwatemung indake  
Me·gamrangna aganjok.

*Balseng:*

58. “Kinatimbo na·simang  
Angni mingsa kattako –  
Angni ripeng Me·gamrang  
Chanchitokbo gisiko.
59. “An·ching dakgrikgenode  
Janggi-jama bon·aigen,  
Bobil dinggrikgenode  
A·rang-a·dang siaigen.
60. “Uni gimin an·chinga  
Ripeng ong·grikainajok –  
Da·omiting namenga  
Songtangtangchi pil·ainok.”
61. Indi ine janapjok  
Pante Balseng matgrikde,  
Namedake chanchijok  
Wa·sagipa gisikde.
62. Me·gamrangba kinajok  
Janapani kattako,  
Mitamrangde chanchijok  
Namgen ine gisiko.

63.    Me·gam Gonggrot indiba  
          Uko raken jegaljok  
          Sina·bon·na nangoba  
          Dakgriksrangna mangsongjok.
  
64.    Pil·e changsa janapjok  
          Da·nang matgrik Balseng·de-  
          Gipin cholko chanchijok  
          Man·a dipet pantede.
  
65.    Uni gimin janapjok  
          Silchidare dontokna,  
          Ine Balseng aganjok  
          Jakrarachi dakgrikna.
  
66.    Me·gamrangni mitamde  
          Da·nang namnikahachim.  
          Indioba Gonggrot·de  
          Uko jegaltaiachim.
  
67.    Uni gimin da·ode  
          Susagrikna nangginok,  
          Silchidare jakbite  
          Dakgriksrangna tarijok.
  
68.    Dakgrikdiligiparangko  
          Balseng da·nang watatjok,  
          An·tangtangni a·damo  
          Dakgrikdilna donatjok.
  
69.    Basucheng·ko donatjok  
          A·dok cholramarango –  
          Name mikrakatpajok  
          Timsochina bobilko.
  
70.    Matgrik Rong·dotpa·koa  
          Samtangtangchi donatjok –  
          Chadrapenba dakgrikna  
          Uni dolko pakwatjok.



71.    Dingcheng rakgipakoa  
       Re·bikpile chagropna  
       Donataha bikoa  
       Bobil janggilchipakna.
  
72.    Uandake tarion  
       Adilrangko sikatjok  
       Hiho-hiho a·bokon  
       Dakgrikbebeangengjok.
  
73.    Chasinape bobilko  
       A·chikrangde dakgrikjok,  
       Adi' dongon u'mangko  
       Den·e-su·e roangjok.
  
74.    Maina da·nang Me·gamrang  
       Gisik' kena napaha,  
       Dakgrikoba uamang  
       Kene be·en moaha.
  
75.    Unon bang·a Me·gamrang  
       Dakgrikao siangjok,  
       Dingrakgipa bobilrang  
       Bilding-bildang ong·tokjok.
  
76.    Unomiting Balseng-de  
       Dakgrikako niwate  
       Dongengachim pantede  
       Doenang-ko rimbite.
  
77.    Unon Megam Gonggrot-de  
       Rang·san chasinapbajok  
       Balseng-kosa ka·kame  
       Den·na mil·lam engdingjok.
  
78.    Niksrapgija Balseng-de  
       Bilwengwate kataha,  
       Unon Me·gam Gonggrot-de  
       Rangsan ga·akangaha.

79.    Uni mil·lam ra·ara  
          Tang·angaha jakoni –  
          Gobrangata gitasa  
          Uni ga·akramoni.
  
80.    Chakatsrapna man·kujaon  
          Balseng asongjetaha,  
          Raka Me·gam Gonggrot-kon  
          Sikko' sikdekdekaha.
  
81.    Unochacha bakbakan  
          Doenang-ba chadrapjok  
          Uni jakrangko rang·san  
          Sakselsele siktatjok.
  
82.    Unon A·chik kotokrang  
          Ka·dongbate chadrapjok,  
          Bobil dingenggiparang  
          Me·gamrangko changduuljok.
  
83.    Basucheng-ba champengjok  
          A·dok batsotramrangko –  
          Bobil katna man·jajok  
          Pilak cholramarangko.
  
84.    Dingcheng aro Rong·dotpa  
          Samtangtangchi bobilko –  
          Changdulbajok u'mangba  
          Kate joknakgipako.
  
85.    Uni gimin bobilrang  
          Kate jokna man·jaha,  
          Indakesa Me·gam-rang  
          Rim·gopako man·aha.
  
86.    Unon da·nang Me·gam-rang  
          An·tangtangko on·kamjok  
          On·kamemung uama·ang  
          Silchidare gaitokjok.

87. ~~indakemung~~ mol·moljok  
An·tangtangko watchina –  
A·chikrango bi·pajok  
U'mang so·otjachina.

88. Mol·molemung uamang  
Da·nang kema bi·pajok,  
Kena ginang Me·gam-rang  
landake aganjok.

*Megamrang:*

89. “A·chik challang matgrikrang  
Chingko kema ka·pabo  
Chingni janggiko mangmang  
So·otgija donpabo.

90. “Mikkang chasong salrango  
Ripeng ong·grikainajok,  
Janggi tanga gimiko  
Bobil daktaijawajok.”

91. Indi ine agane  
U'mang mol·molbeaha,  
Olakie tubame  
Da·nang kema bi·aha.

92. Me·gamrangni bi·ako  
Balseng kinachakpajok,  
Uamangni kattako  
Kinachake ra·chakjok.

93. Uandaken u'mangko  
Balseng kema ka·aha –  
Me·gam dongsipparangko  
So·otgija wataha.

94. U'mang' silchidareko  
Indioba keprikjok-  
Pilak dakgrikaniko  
A·chikrangan ra·rikjok.
  
95. Da·nang Me·gam Gonggrotko  
Indioba watjaha,  
Ka·namgija bobilko  
Karomtome donaha.
  
96. Uko karomtomeming  
Rong·patalo donaha,  
Songchi ra·na inemung  
Koksep nokmao chipaha.
  
97. Wa·ge wa·pong ro·achi  
Koksep nokmao kakapjok  
Pante sakchet songoni  
Ripee ra·na tarijok.
  
98. Uandake panterang  
Sakchet ripeangaha,  
Gonggrotkode manggittang  
Songchi ra·angtokaha.
  
99. Me·chik·desa nichina  
Me·gam Gonggrot bipako-  
Nike kusi ong·china  
Bobil dingrakgipako.
  
100. Unon pilak A·chikrang  
Dakgrikramo tom·dakjok,  
Rasonggragra uamang  
Kimkokimko inchrojok.
  
101. Uandake re·bajok  
Songtangchina A·chikrang-  
Il·ilgimgim a·dingjok  
A·chik kotok jinmarang.

102.   A·chik kotok gimikni  
          Bang·gijasa siangjok  
          A·rang-a·dang songoni  
          Ka·sa-ka·sa bon·angjok.
  
103.   Jeba ong·bo siangjok  
          Jatna janggi on·chake  
          Da·nang u'mang dongjajok  
          Bobil' jako ga·ake.
  
- 104    Me·gamrangde indiba  
          Da·nang bang·an siangjok,  
          U'mangoni mitamsa  
          Songchi sokangpil·aijok.
  
105.   Dareriprip bil·chamko  
          Jako ra·bitangtokjok –  
          Wala andalmitmato  
          A·chik kotok re·angjok.
  
106.   Balsri gittim songona  
          U'mang kobor on·atjok  
          A·chik songsongantina  
          Katta watritingatjok.
  
107.   Kinasojok koborko  
          A·chik songni manderang,  
          Dakgrikramni kattako  
          Songo dongsogiparang.
  
108.   Songo-noko niksojok  
          Bil·cham dareripripko  
          Ramajoljol jasengjok  
          Buring a·chang gimiko.
  
109.   Songo dongsogiparang  
          Tom·batokjok a·talao  
          Da·nang A·chik manderang  
          Songjatchini sa·rao.

110. Unon A·chik kotokrang  
Ruechinchin sokbajok,  
Dinggrikgipa A·chikrang  
Song'na gadoangtokjok.
  
111. Songjatchio donejok  
Me·gam Gonggrot bipako,  
Sa·rao ongalwatejok  
Koksep nokmao chipako.
  
112. Gantong dane so·aha  
Songni sa·ra jatchio,  
Wal·tim jale sikaha  
Dareriprip a·talao.
  
113. Dakgrikgipa A·chikrang  
Songjatchio tom·tokjok,  
Pilak chalang matgrikrang  
Ja·nengtakna chanchijok.
  
114. Doenang-mung Balseng-ba  
Neng·takaha ringrangrang -  
Bisong baksa Rong·dotpa  
Dingcheng aro Basucheng.
  
115. Songsongantin' A·chikrang  
Sokbatokjok il·gimgim,  
Tom·bagipa jinmarang  
Songnok gimik simdimdim.
  
116. A·a bikil mopile  
U'mang inchrotokaha,  
'Biri rong·kuchakpile  
Jatna rasong on·aha.
  
117. ~~Doke-dam~~·e an·saojok  
~~Kimko-kimko~~ dakpile -  
Adilrangko sikatjok  
Songsonganti jangpile.

118. Bobilrangko cheana  
Songo katchaan' gapaha-  
Ua salko dal·nikna  
Chrok-susae roaha.
  
119. Songni sa·ra a·talao  
Mande jinma tom·enga,  
Nie Me·gam Gonggrot-ko  
Tamasako dakenga.
  
120. Songni nomil-panterang  
Katchae an·saotokenga –  
Wal·tim samo uamang  
Chroksusae roenga.
  
121. Sara wal·tim wilwile  
Warekdimdim mesajok  
Kimko-bikbo dakpile  
Il·ilgingim a·dingjok.
  
122. Rong·dotpa aro Dingcheng  
Mil·lam seppi keaha  
U'mang baksa Basucheng  
Griksusae roaha.
  
123. Songni pilak manderang  
Chalang songjok panteko,  
Janggilsako te·jangjang  
Ripeemung Balseng-ko.
  
124. Doen' bal·ekrakgipa  
Balseng-ma·angni ki·sango  
Me·gam ganding ganenba  
Ka·dingatjok jinmako.
  
125. Done Me·gam Gonggrot-ko  
Songni sa·ra jatchio,  
Bawiltokjok wal·timko  
Wal·tim ~~dare~~ripripko.

126. An·saoani ku·rangrang  
Jangjok songnok gimikna  
Pilak doka·dam·arang  
Rasonggragra A·chikna.
127. Unomiting somoio  
Sonajing·ming Norindik  
Rojok jinma jatchio  
Ringrang·ringrang ku·chimit.
128. Songni buchumarangba  
A·chik ama·ambiko  
Wajo·wajo dakenba  
Kore dokjok u'mangko
129. Songni budeparangba  
Ra·e sel·u me·golko  
Gaku·gaku dakenba  
Nie rojok jinmako.
130. Unochacha somoio  
Saksa songni me·apa  
Nappretbajok jinmako  
Ka·ting·rang·ting dakgipa.
131. Ukon minga Wangdopa  
Saksa nawang ronggitting,  
Jakchi·bilchi sokgipa  
Bipa sikkal ka·gitting.
132. Uandake nappretbae  
Jol·jol·bikbik jinmako  
Sel·u pongsa jakbitbae  
Su·jok Me·gam Gonggrot·ko.
133. Koksep nokmao chipako  
Bil·sa krenge su·atjok,  
Da·nang Megam Gonggrot·ko  
Oksikjoljol nangejok.



134.   Me·gam Gonggrot dal·gipa  
          Koksep nokmao dongari –  
          Krengé nijok rakgipa  
          Bikma naruruari.
  
135.   Indioba sijaha  
          Da·nang Megam Gonggrot-de  
          Una mamung ong·jaha  
          Uko den·o-su·ode.
  
136.   Uandake ukode  
          Mangkimana man·jaha  
          Sala sini batoba  
          Me·gam Gonggrot sijaha.
  
137.   Bikma naruruako  
          An·tang siknappilari,  
          Namataha pariko  
          Ku·chi situdapari.
  
138.   Uko nike manderang  
          Aiao inmantokaha,  
          Song-nokni me·aparang  
          Gisik' kena napaha.
  
139.   Raka Me·gam Gonggrotni  
          Sigijani a·selko –  
          U·ijajok uamang  
          Uni janggi silchiko.
  
140.   Uni gimin uamang  
          Nawang·ku·wang dakaijok,  
          Pilak songni manderang  
          Da·nang namen kenbejok.
  
141.   Sigijani a·selko  
          Songsonganti sandina  
          Songni me·aparangko  
          Watjok a·rong-a·sakna.

142. Dolsa sandigipade  
Dokrekpa-ming Dingrepa –  
Bal·ek-rokrek u'mangde  
Sakginiba sadusa.
143. Saldok-waldok re·angon  
Dokrekpaming Dingrepa  
Song-me·chik Wadro songon  
Nadikejok sadusa.
144. Da·nang ua songode  
Me·chik randirarasa –  
Me·asako nikode  
Chasekseka dongnasa.
145. Song-me·chikko nikkuja  
Da·nang bisong sadusa  
Mamung ma·sipagija  
Song napejok mamasa.
146. Songo' soksrapkujaon  
Me·chik jinma chabajok  
Mamungkoba sing·gijan  
Sadusako salangjok.
147. Dokrekpako sikangjok  
Me·chik bolchabegipa  
Biltetoba jokjajok  
Krengna name man·jaenba.
148. Da·nang Dingrepakoa  
Me·chik nomil sakgini  
Salsekgrikjok bikoa  
Romrom-mital changsini.
149. Sadusakon indake  
Ua songni me·chikrang  
Sakantian sekseke  
Man-na sikjok an·tangtang.

150. Jokna jotton ka·oba  
U'mang jokna man·jaha,  
Katdupana dakoba  
Katna cholan dongjaha.
151. Do·o doksimsimari  
Bijak song·e on·aha  
Do·ga chipchangchangari  
Rona-chona watjaha.
152. Uandake dongangon  
Sala sini ong·angjok,  
U'mang songtang-noktangkon  
Da·nang gualangpiljok.
153. Salsaode indiba  
Ua songni buchuma  
Dokrekpako nokona  
Rimangaha Dadilma.
154. Ka·sariri ku·rangchi  
Dokrekpako sing·aha –  
“Na·simanga banoni  
Maina re·ba?” inaha.
155. Salsinini ramani  
Ianona sokbara  
Chinga Balsrigittim-ni”  
Ine aganchakaha.
156. “Mingsa katta a·selko  
Sandinasa re·bara –  
U·ijaesa songnokko  
Ianona sokbara.
157. Raka Me·gam Gonggrot-ni  
Sigijani a·selko –  
Uni janggi silchini  
Donnuani kattako”.

158. Indi ine aganjok  
Dokrekpamung Dingrepa  
Uko knae ka·dingjok  
Wajo-wajo Dadilma.
159. Wakonggrangrang ka·dinge  
Gaku-gaku dakpajok,  
Dadilma-ba ka·sine  
Iandake aganjok.

*Dadilma:*

160. “Me·gam Gonggrot’ janggiko  
Na·simangna agangen –  
Uni janggi silchiko  
Mangkimana neng·begen.
161. “Me·gam Gonggrot’ janggide  
Ambitangni jakosa  
Ambitangni dongramde  
Rong·kol mitap ning·osa.
162. “Jo·ong nikrakhijaosa  
Uni janggi sikenga,  
Siltok timi ning·osa  
Ambigipa jillenga.
163. “Ripok sike ganenga  
Ambitangsa timiko,  
Chipu nokma dongenga  
Grimra rong·kol ku·mango.
164. “Jadok paksa tusia  
Me·gam Gonggrot ambitang  
Jadok paksa simaka  
Salba walba sikatang.
165. Indi ine aganjok  
Dadilma-de bebeko,  
Ka·sachake parakjok  
Domuani kattako.

166. Kattarangko kinae  
Sadusaba ku·mongjok,  
Dadilmako mittele  
Wala andalmitingon.
167. Dokrekpa-mung Dingrepa  
Do·gisika paksaon –  
Katsruk bajok sadusa  
Wala andalmitingon.
168. Uandake re·bae  
Songtangona sok bajok,  
Songme·chiko robae  
Katta kobor man·bajok.
169. Sadusaba sokbae  
Songtang Balsrigittim-na  
Kattarangko agane  
On·jok pante Balseng-na.
170. Raka Me·gam Gonggrot-ni  
Sigijani a·selko  
Uni janggi silchini  
Donuani kattako.
171. Pante Balseng kinajok  
Sigijani kattako,  
Am·e nina chanchijok  
Me·gam Gonggrot' janggiko.
172. Doenangba panteba  
Jaktomenba krengatjok,  
"Mama Balseng angaba  
Re·gen ine aganjok."
173. Unon rang·san chabajok  
Nokpante'ni bilone,  
Doen' ka·ting dakbajok  
Mil·lam jako engdinge.

174. "Doen' angming re·paode  
Uan nambebeginok –  
Na·a ka·sapaode  
Dakchakpana man·najok.
175. "Indioba da·ode  
Rasong dakpakunabe  
Re·na·dona sikkangde  
Ka·o nangpakunabe."
176. Indi ine aganjok  
Da·nang matgrik Balseng·de  
Re·chakatna tarijok  
Gisik rake pantede.
177. Balseng aro Doenang  
Tarienba dongaha,  
Wala do·gisikaona  
U'mang da·nang sengaha.
178. Do·gisika paksaon  
U'mang chakatangaha,  
Darang simakkujaon  
Re·chakatangtokaha.
179. Doenang·mung Balseng·de  
Uandake re·angjok,  
Sonajing·ming Norin'·de  
Da·nang u·irikjajok.
180. Jol·jol batsrukangtokjok  
Seng·nachipak uamang  
Nipil·nichaoangjajok  
Balseng aro Doenang.
181. Katang·re·ang dakange  
U'mang da·nang chel·angjok  
Dingram Gitok batange  
Me·gam songko nigamjok.

182.   Dingram Gitok A·doko  
           Name gisik rakangjok –  
           Wala attam simsimo  
           Me·gam song'na sokangjok.
  
183.   Song sikkopang a·doko  
           U'mang chadengdikaha –  
           'Biri rong·ma patalo  
           Songko nigamataha.
  
184.   Song-nok gittim simdimdim  
           Tokchang dimchang ma·ata,  
           Nokking jala il·gimgim  
           Ka·pakmana nikode.
  
185.   Adigita indake  
           Dongjok rong·ma pattalo  
           Maiko dakna chanchie  
           Attam wala simsimo.
  
186.   Balseng aro Doenang  
           Uandake dongaha,  
           Wala andalkuchina  
           Ine u'mang sengaha.
  
187.   Unomiting somoio  
           Songni nomil sakgini –  
           Re·pakbajok ramako  
           Chikoenba chigaoni.
  
188.   Da·nang uamangara  
           Me·gam nomilrangsachim,  
           Sakginiba sarisa  
           Golpo ka·baengachim.
  
189.   U'mang da·nang re·baemung  
           Rong·ma samba ramako –  
           Nikatjajok walemung  
           Doenang-mung Balseng-ko.

190. Nomilrangni saksade  
“Gong-rak, sari” inenga,  
Rong-ma samba sokode  
Kena gisik ra-eng.

191. Indioba nomilrang  
Agangrike roenga –  
landake uamang  
Golpo ka-joljolenga.

*Saritang saks:*

192. “Kena gisik ra-mana  
Ia rong-ma sambaode,  
Ka-sinjrjmjrjm dakmana  
Un’ sambako re-ode.

*Saritang sakgipin:*

193. “Maina kena indake  
Sari angna aganbo  
Angna mang-mang parake  
Kenna nangan kattako.

*Saritang (skanggipa):*

194. “Da-nang Me-gam Gonggrotni  
Janggi silchi sigija  
Pilak a-gilsakoni  
Dongnuenga nikgija.”

*Saritang (gnigipa):*

195. “Bano mancha uara?  
Sari angna aganbo –  
Dongjaarang gipinba  
Angna mangmang mesokbo.”



*Saritang (skanggipa):*

196. "Ia rong·ma rong·kolon  
Donga uni janggide –  
Indioba rong·kolkon  
Nikpajawa ramramde.
197. "Rong·ma rong·kol ku·mango  
Bolbok pangsa chapenga,  
Ua bolbok ja·pangko  
Chipu nokma dongtima.
198. Sarisani indake  
Agangrike roako  
Doenang-mung Balseng-de  
Kinarikjok kattako.
199. Balseng aro Doenang  
Kattarangko rongtaljok,  
Dakna nangako seng·gnang  
Namedake chanchijok.
200. Tusiritikkuchina  
Me·gam songni manderang –  
Attam waltingatkuna  
Ine dongjok uamang.
201. Wala jatchi ong·bajok  
Andalmitmat pilakchin  
Manderangba tusijok  
Si·indikdik ka·sinjrim.
202. Unon da·nang uamang  
Rong·ma pattal kosakni  
Balseng aro Doenang  
Ong·onbajok unoni.

203. Ong-onbaemung dongdikjok  
Gam·a kinatimchengna –  
Songchipakko niwatjok  
Namedake ma·sina.
  
204. Unon da·nang ka·sinjrim  
Samtangtangchin chi·indik,  
Mitmat-mitmat andalsim  
Waltingangon sikdikdik.
  
205. Unochacha bakbakan  
Balseng bil·cham tarijok,  
Bil·cham nate mamas an  
Rong·kol ku·mang re·angjok.
  
206. Dareriprip bil·chamko  
Doen' mikkang' natangjok,  
Pilak dakna nangako  
U'mang agangrikangjok.
  
207. Re·angaha indake  
Rong·kol ku·mang ja·paona  
Jeba ong·bo ka·donge  
Bobil dinge nistrangna.
  
208. Adigita re·angon  
Bolbok bolma' nikatjok,  
Bil·chamkode sambengon  
Rong·te sako donangjok.
  
209. Bolbok ja·pang mikkango  
Doenangko donaha,  
Ua samdim jatchio  
Gogorenga dakaha.
  
210. Grimra rong·kol ku·mango  
Balseng an·tang dongaha,  
Bolbok samba mittino  
Mil·lam ra·e timaha.

211. Matsramgipa mil·lamko  
Jaksamgini engdinge  
Den·na chipu nokmako  
Timjok Balseng ka·donge.
212. Adi dik-dik dongari  
Chipu nokma il·lengjok,  
Jrutim simdim dandare  
Doenangchi malbajok.
213. Unochacha somoion  
Doenang-de apjitjok  
Nikatgijan an·tangkon  
Rang·san wengwat katsojok.
214. Bolbok ja·pang nangsrape  
Chipu nokma malbajok,  
Gam·a ku·rang sandie  
Del·dik tom·tom dongdikjok.
215. Tiktak unomitingo  
Balseng an·tang mil·lamchi  
Den·jok chipu nokmako  
Krengge jaksamginichi.
216. Unon chipu nokmade  
Sina gogorengaha  
Den·a gitok chottome  
Ku·sik wangdataiaha.
217. Be·en tong·sa gimikde  
Chipu nokma krengaha  
Gong·geng-gong·geng wentonge  
Sina bilgitdakaha.
218. Unochacha somoio  
Doenang-ba chabajok  
Be·en gong·genggipako  
Tong·tang tong·tang den·tongjok.

219. Ua chipu nokmako  
Uandake so·otjok  
Balseng uni sikkoko  
A·o gope galbajok.
220. Balseng aro Doenang  
Bil·cham so·e nattaijok  
Adaloba wal·ginang  
Rong·kol ning·chi napangjok.
221. Adigita napangon  
Rong·kol ning·chi sokangjok,  
Kolning mitaptingchagon  
Buchumako nikejok.
222. Me·gam Gonggrot ambitang  
Jadok tusipekenga –  
Inggok ra·e sikatang  
Sia gita tuenga.
223. Unon Balseng rang·gitik  
Rasotajok ripokko  
Ganengako tong·kandik  
Buchumani gitoko.
224. Rasoteming ra·aha  
Ua janggin' timiko,  
Unon rang·san katbaaha.  
Wate u'mang rong·kolko
225. Buchumako rong·kolo  
Tekchangchipe donbajok,  
Ra·e janggin timiko  
Walon songchi katbajok.
226. Me·gam songni ramako  
U'mang bikbik katbajok,  
Do·gisikna paksao  
Balsrigitim' sokbajok.

227. Doenang-mung Balseng-ba  
Walgimikan tusija –  
U'mang songna sokbaoba  
Walde name seng·kuja.
228. Uni gimin uamang  
Tujok nokpanteosa,  
Balseng aro Doenang  
Sruk-sruk gadoangesa.
229. Pilak songni manderang  
Pringo chakatokosa  
Chakatpajok uamang  
Chakatronga gitasa.
230. Chakatemung re·bajok  
U'mang nokpanteoni  
Songko-nokko niwatjok  
Donge a·talaoni.
231. Okamatjok uamang  
Songni me·aparangko  
Balseng aro Doenang  
Aganpana koborko.
232. Unon songni manderang  
Tom·batokjok warekrek –  
Dingcheng aro Basucheng  
Rong·dotpa-mung rokrekre
233. Sonajing-mung Norin' -ba  
Songni me·chikrang baksa  
Re·bapajok u'mangba  
Kobor kinana gita.
234. Songni sa·ra a·talao  
Warekdimdim tom·dakjok,  
Da·nang Me·gam Gonggrotko  
Jatchi done nitokjok.

235. *Da·ode* Megam Gonggrot-ba  
Sikkang gitan ong·piljok –  
Bikma ruruahaoba  
Siknapaton nampiljok.
236. Sa·ra wal·tim sikao  
Mande jinma tom·enga,  
Me·gam Gonggrot sambao  
Tamasako dakenga.
237. Unon pante Balseng-de  
Ra·e janggin' timiko –  
Jinmarangna mesoke  
Aganprakjok kattako.
238. Me·gam Gonggrot janggini  
Sigijani a·selko –  
Man·bagimin an·tangni  
Uni janggin' timiko.
239. Balseng da·nang sing·pajok  
Songni me·aparango  
Maiko dakgen inpajok  
Bobil Me·gam Gonggrot-ko.
240. Maina Me·gam Gonggrotni  
Janggi silchi tangenga –  
Ra·bitgipa Balseng-ni  
Timi ning·o donenga.
241. Unon jinma Balseng-na  
Indi ine aganjok,  
“Nanggen uko so·otna  
Da·wat', da·on” intokjok.
242. Uni gimin Balseng-ba  
'Un' janggin' timiko  
Wal·gantengko ra·enba  
Angdingdingjok wal·kio.

243. Unon Me·gam Gonggrot-de  
Gogorenge tengtojok –  
Koksep nokma be·chipe  
Baranggaosa romromjok.
244. Ja·a-jakko kaarangde  
Indioba jokkuja,  
Romromoba Gonggrot-de  
Kate jokna man·kuja.
245. Ronromeming sokbajok  
Gonggrot Balseng' sambaona,  
Ku·gap-mikjap dakpajok  
Maiakoba aganna.
246. Jakko kabita ginang  
Jaksamgini chopjoljok,  
So·otjachina da·nang  
Me·gam Gonggrot mol·moljok.
247. Uko kinae Balseng-de  
Pil·sa chanchipilaha –  
Jeba ong·bo pantede  
Gisik' ka·sachakaha.
248. Uni gimin sing·aha  
Balseng pilak mandeo  
Maiko dakbo inaha  
Songni me·aparango.
249. Rong·dotpa aro Dingcheng  
Namedake chanchijok  
Aro chalang Basucheng  
Iandake aganjok.
250. "Uni janggi silchiko  
Saoba dontimngenoba  
Basakoba changsao  
Uko cha·ugen saoba.

251. “Uni gimin da·ode  
Raka Megam Gonggrot-ko  
So·otana agrede  
Nikjajok gipin cholko.

252. “Uko da·on so·otbo  
Me·chik desa nikchina,  
Pilak jatni bobilko  
Bobil dongtaijachina.”

253. Uandake aganjok  
Rong·dotpa aro Dingcheng  
Jinmarangba namnikjok  
U'mang baksa Basucheng.

254. Indioba Sonajing  
Namedake chanchijok –  
So·otako manggitting  
Ua ong·nikchakjajok.

255. Uni gimin Sonajing  
Jinmaona re·bajok,  
Ka·san ku·rang ka·sinsin  
Iandake aganjok.

*Sonajing:*

256. “Songni appa rajarang  
Anga mingsa agangen –  
Angni A·chik ma·paarang  
Na·simangna janapgen.

257. “Me·gam Gonggrot an·chingni  
Bobil ong·genchimoba  
Da·o so·otgalani  
Kakket ong·ja indiba.

258. “Dakgrikramni a·baon  
Dakgrikao amode –  
Nambatgenchim uanon  
Uko so·ot' galode.



259. "Bobilkoba manggittang  
Rim·gopesa ra·baode  
Gisik pil·kal an·tangtang  
Done nibo ukode.

260. "Uni gimin da·ode  
Kema ka·e donkubo –  
Uni gisik pil·ode  
Uko watpilatpabo."

261. Sonajing-ni indake  
Aganako kinaon  
Doenang-ba chakate  
Aganpajok iakon.

*Doenang:*

262. "Bobil Me·gam Gonggrotko  
So·otgija watode –  
Uni janggin' timiko  
Sawa dongen simsake."

*Sonajing:*

263. "Sakgipinni janggiko  
Jawa kepe donode –  
Ka·genoba kemako  
Dongjawakon namgnide."

264. Songni me·aparangba  
Kattarangko kinajok,  
Songko dilgiparangba  
Namedake chanchijok.

265. Sonajing-ni kattako  
Uamangba ra·chakjok,  
Me·gam Gonggrot bobilko  
Watatpilna namnikjok.

266. Uni gimin wataha  
Da·nang Me·gam Gonggrot-ko  
Ja·ko-jakko engaha  
Kakrengkote donako.
267. Da·nang Me·gam Gonggrot-ba  
An·penenba chakatjok,  
Sikko' bamchikkopenba  
Balseng-china re·bajok.
268. Re·baenba Balseng-ko  
Chang·sa olakkiaha –  
Indakenba sambao  
Asonggope dongaha.
269. Pante Balseng salchroe  
Raka Me·gam Gonggrot-ko  
Salam ka·jok ka·dinge  
Doktopenba janggilo.
270. Unon Me·gam Gonggrot-de  
Mikchi gragra ong·bajok,  
Jaksamgini chopjole  
Iandake aganjok.

*Me·gam Gonggrot:*

271. “Angko kema ka·pabo  
Bobil dakgrikarangna –  
Ka·sachake watpabo  
Janggimangmang tangpana.
272. “Angko nokkol dakpabo  
Songni nokma rajarang –  
Ang' janggiko donpabo  
Angni A·chik ripengrang.
273. “Chasong janggi tangao  
Bobil daktaijawajok  
Pilak A·chik mandeko  
Jong·ada ‘ne changinok.”

274.   Indi ine agane  
         Me·gam Gonggrot mol·moljok,  
         Jinmachina mikkange  
         Ua salam ka·atjok.
275.   Rong·dotpa aro Dingcheng  
         Gonggrot·ona re·bajok,  
         U'mang baksa Basucheng  
         Uko salam ka·ejok.
276.   Unon pilak A·chikrang  
         Apsan inchrotokaha,  
         Tom·bagipa jinmarang  
         Uko namniktokaha.
277.   Unon Balseng chanchijok  
         Me·gamrangko okamna –  
         Tom·dakgrikna nangnikjok  
         Songgigrike mesokna.
278.   Manderangko watatjok  
         Me·gamrangni songona,  
         Katta kobor on·atjok  
         Uamangko okamna.
279.   Sal somoiko donatjok  
         Nama salko chanchie,  
         Soka chakna tarjok  
         A·chikrangba ku·monge.
280.   Salmanchia soko  
         Me·gamrangba re·bajok,  
         Balsrigittim songona  
         Merong-mechu olbajok.
281.   Ruechinchin Me·gamrang  
         Da·nang sokbatokaha,  
         Noko dongkalgiparang  
         Do·o wakko olbaaha.

282. Mitamrangko dakgrikao  
 Sie bon·angahaoba,  
 Bon·ja gita u'mangko  
 Nikkuenga indiba.
283. A·chikrang-mung Me·gam-rang  
 Damsan Balsrigitim-o  
 Korekdimdim uamang  
 Tom·dakaha sa·rao.
284. Unon pante Balseng-de  
 Jinmarangni mikkango  
 Cheng·reng ringreng ong·kate  
 Chadengejok jatchio.
285. Uandake chadenge  
 Jakran' jakko songdojok,  
 Pante ka·dingsimite  
 Indi ine aganjok.

*Balseng:*

286. "Ang' jongada Me·gam-rang  
 Rimchaksoa salamne  
 An·chingara songsulrang  
 Kema ka·griknahane.
287. "Chinga Me·gam Gonggrot-ko  
 Uni gimin watpiljok,  
 Uni janggi silchiko  
 Da·o nisijawajok.
288. "Me·gam Gonggrot' janggide  
 Donga ia timion –  
 Chinga uko da·ode  
 On·pilgen bini jakon."

289. Iarangko agane  
Balseng da·nang asongjok,  
Jakpa doke a·boke  
Jinmarangba inchrojok.
290. Unon Me·gam Gonggrot-ba  
Mikkangona re·bajok,  
An·tang jakko de·enba  
Iandake aganjok.

*Me·gam Gonggrot:*

291. “Nibo ang’ jongadarang  
A·chikrangni gisikko-  
Pilak ripeng Me·gamrang  
U’ mang’ kema ka·ako.
292. “U’ mang ka·sachakjaode  
An·ching simangiminchim,  
Angni jamajanggide  
Da·nang dongjawahachim.
293. “Uni gimin an·chingba  
Hai, mo angjongadarang  
Pangnan ripeng ong·naha  
A·chikrangmung Me·gamrang.
294. Me·gam Gonggrot rakgipa  
Iandake aganjok,  
Ka·ting-rang·ting dakgipa  
Da·o ka·a benamjok.
295. Unon Me·gam jinmarang  
• Chro·chro inchrotokaha,  
Kusi ong·e uamang  
Bildo·bilchichiaha.

296. Uandake uamang  
Da·nang songgigrikaha,  
A·chikrang-mungMe·gamrang  
Ripeng ong·grikangaha.
297. U'mang nangrimgrikako  
Chasong gisik ra·china  
Maniaha un' salko  
U'mang dal·e mesokna.
298. Uni gimin uama·ang  
Cha·e-ringe roaha,  
Pilak tom·bagiparang  
Namen kusi ong·aha.
299. Unomiting somoio  
Songni me·chikmarangde  
Chanchiaha gisiko  
Dakna mingsa kamkode.
300. Nangrimgrikani salko  
U'mang gisik ra·pana  
Sonajing-mung Balseng-ko  
Unon bia-ka·atna.
301. Songni pilak mandena  
U'mang da·nang aganjok,  
Ukon pilak mandeba  
Kusi ong·e namnikjok.
302. Indakenba Balseng-ko  
Pante jinma salangjok-  
Jechakoba panteko  
U'mang kinachakjajok.
303. Sonajing-paan nokona  
U'mang salangtokaha  
Uko bia-ka·atna  
Jechakoba watjaha.

304. Sonajing-ba nomilba  
Pagipani nokoni –  
Ong·katsojok biaba  
Nokdring kuturioni.
305. Sonajing-mung Balseng-ko  
Am·pok jagro bolsao  
Asongatjok bisongko  
Nokni grimra jatchio.
306. Unon da·nang bisongko  
Janggamchipe nikaijok,  
Mikkang bimang an·gilrang  
Ma·gap-ma·gap nambejok.
307. Nokjangchio simdimdim  
Mande jinma timoljok,  
Sara-saatal warekdim  
Manderara gaptokjok.
308. Doenang-koba da·nang  
Uachacha somoio –  
Saldrakbajok panterang  
Mande jinma jatchiko.
309. Doenang-de adita  
Biltetmika dakaha,  
Panterangde indiba  
De·tomdraen ra·baaha.
310. Uandake rimbajok  
Uko nokjangchiona  
Jako sike salbajok  
Balseng-ma·angni sambaona
311. Songni nomil jinmaba  
Norindik-ko salbajok,  
Ua gong·ja dakoba  
Salrurue rimbajok.

312. Unon nomil jinmarang  
Norindik-ko man·bajok,  
Asongchina uama·ang  
Am·pok bolsa on·pajok.
313. Norindik-ba asongjok  
Doenang-mung am·poko –  
Da·nang tom·tom dongaijok  
Kirat cha·e gisiko.
314. Jora gini indake  
U'mang asongtokaha,  
Bia ka·na tarie  
Bamchikkope dongaha.
315. Songni kamal sakgini  
Mande A·chik bewalo  
Do·bik nie changsini  
Do·siatjok u'mangko.
316. Kamal chachat so·aha  
U'mang mikkang wal·timo,  
Ku·mituchi sing·aha  
Do·siani kattako.
317. Uandake u'mangko  
Unon bia·ka·atjok  
Umang jora giniko  
Kamal do·siatmanjok.
318. Balseng aro Sonajing  
Asongaoni chadengjok,  
Jakko rim·ritingeming  
Bamchikope dongpajok.
319. Doenang-mung Norindik  
Balseng-ma·angko ja·rike –  
Uamangba ku·chimit  
Dongjok da·nang chadenge.



320. Nagirako dokatjok  
Durubolni nokdringo,  
Unon jinma tom·tokjok  
Balsrigittim sarao.
321. Sonajing-mung Balsengba  
Ong·katbajok sarao –  
Ringreng jingjeng dakenba  
Kusi ginang mikkango.
322. Norindik-mung Doen-ba  
Balseng-ma·angni ja·mano  
Ong·katbajok u'mangba  
Jipjang jipjang a·palo.
323. Unon Me·gam Gonggrot-ba  
Bel·dim-del·dim ong·katjok,  
Jaktangko bawangenba  
Balseng-ma·angko rimsojok.
324. Rimsoenba u'mangko  
Ua salam ka·aha,  
Sonajing-mung Balseng-ko  
Da·nang pattiataha.
325. A·chikrang-mung Me·gamrang  
Namen kusi ong·aha,  
U'mang nangrimgrikarang  
Bate mangrakbataha.
326. Maina pante Balseng-ba  
Da·o bia ka·aha –  
Aro Me·gam Gonggrot-ba  
Jokatako man·aha.
327. Uni gimin an·senge  
Da·nang u'mang roenga,  
Kimko-kimko dakpile  
Songo cha·e-ringenga.

328. Sonajing-mung Balseng-ba  
Jinmarangni mikkango  
Asongejok u'mangba  
Ringrang ringrang a·talao.
329. Doenang-mung Norindik  
Uamangba asongjok –  
Unikode rang·gitik  
Doenangde chakatjok.
330. Chakatemung Doenang  
Dama bolsa keaha,  
Do·me pote saksantang  
Dama doke chrokaha.
331. Unon da·nang Norindik  
Doenang-ko ja·rike –  
Mesaangjok ku·chimit  
Nomil jakpa ripraper.
332. Adi donge dikdikon  
Da·nang Me·gam Gonggrot-ba  
Indakmiting somoion  
Chakatbajok biaba.
333. Chakatemung Balseng-na  
Dama bolsa ra·bajok,  
Mesadile rochina  
Uko bina on·ejok.
334. Chakatemung Balseng-ba  
Kejok da·nang damako –  
Pil·sa niwilwalenba  
Ong·katbajok a·palo.
335. Dadiatjok damako  
Paripjangjang dakpile,  
Songo-noko gimiko  
Ka·srok-ka·srok jangpile.

336. Unon da·nang jinmarang  
 Il·leng-mojimtokaha  
 Ringrenggijan uamang  
 Da·nang dongna man·jaha.
337. Sonajing-ba nomilba  
 Ong·katbajok ringrangrang-  
 Ku·chimitmit dakenba  
 Ja·ku de·e tapchengcheng.
338. Uandake re·baemung  
 Nitoriri chadengjok,  
 Ja·pa ga·suetemung  
 Balseng baksa mesajok.
339. Balseng aro Sonajing  
 Pa·ripjangjang mesajok,  
 Norindik-mung Doenang  
 Chroke ja·rikangpajok.
340. Da·nang Me·gam Gonggrot-ba  
 Grike rojok mikkango,  
 Mil·lam seppi ra·enba  
 A·chik dake an·tangko.
341. Songni nomil panterang  
 Jikjak jikjak ong·katjok,  
 Chrokna changkalgiparang  
 U'mang baksa chrokpajok.
342. Dingcheng aro Basucheng  
 Mil·lam seppi ra·aha,  
 A·chik matgrik mikkimsreng  
 Griksusae roaha.
343. Rong·dotpa-ba adilko  
 Duret-duret sikatjok,  
 Adil ku·rang teng·ako  
 Pilakchinan kinajok.

344. Kimko-bikbo dakpile  
U'mang mesatokaha,  
Wangalana batpile  
Songnok a·dingchipaha.
345. Me·gamrang-mung A·chikrang  
Damsan katchae an·sengjok,  
Da·ontaltal uamang  
Chasong ripeng ong·angnok.
346. Songni budeparangba  
Nie rojok u'mangko -  
Gaku-gaku dakenba  
Nokni balim sambao.
347. Songni buchumarangba  
Gol·dik me·gol chanari  
Nie rojok u'mangba  
Wajo-wajo dakari.
348. Pilak sikkang chasongo  
Iandake ong·kuja,  
A·chik a·song gimiko  
An·sengani sokkuja.
349. Songni nokni nangrima  
Batjok ua chasongo,  
A·chikrangni ku·monga  
A·chik a·song gimiko.
350. Ku·mong-nangrimgrikachi  
Bobilrangko cheaha,  
Ka·saan bilakanichi  
Jatna rasong on·aha.
351. Uandake chanchijok  
Songni me·aparangba,  
Rasonggragra a·dingjok  
Songko dilgiparangba.

352. Cha·e·ringe nioba  
U'mang cha·na bon·jaha –  
Chrokmesae rooba  
Nomilrangan neng·aha.
353. Salsa-walsa indake  
Chrokmesae roaha  
Wak-matchuko dandake  
Cha·e·ringe roaha.
354. Pekgiparang pekangjok  
Gangborakrak gitile,  
Man·giparang cha·angjok  
Bikma rongbol dakpile.
355. Pringwal seng·o niwatjok  
Balseng da·nang mikgrake,  
Jinmachiko niatjok  
Nokdecholo chadenge.
356. Dakgrikramni a·bao  
Mande sigimin gita –  
Nikatajok u'mangko  
Dandak manggisi gita.
357. Doenang-ba re·bajok  
Norindik-ko rimbite  
U'mang ka·dingwakwakjok  
Jinmachiko niate.
358. Adigita salchuon  
Simakbajok mitamrang –  
Wa·kaprangko dokaton  
Peka namkalgiparang.
359. Indioba mitamde  
Mojim-siksakbakuja,  
Duga peksimgipade  
Da·nang simakbakuja.

360. Uni gimin chanchijok  
Ka·dingatpana da·nang  
De·mesana re·bajok  
Uamangko Doenang.
361. Me·asarang pilakko  
Doen' demesapajok –  
Mikselgijagipako  
Mikkang do·ki nongatjok.
362. Me·chik pekgiparangko  
Norindik-ming Sonajing  
De·masajok u'mangko  
Morekreke ka·sinsin.
363. Simakninggijarangko  
Mikkang' dimak tokaha,  
Indakenba jinmako  
Ka·dingate roaha.
364. Uandake de·mesaon  
U'mang mikgraktokaha –  
Adi donge dikdikon  
Da·nang chakattokaha.
365. Chakateming uamang  
Mepring cha·tok-ringtokjok  
Unikoa pilakan  
Songni sarao tom·taijok.
366. Cha·e-ringe uamang  
Songtangchina re·pilna  
Aganpajok Me·gamrang  
Pilak A·chik mandena.

*Me·gamrang:*

367. “Cha·e-ringe robejok  
Na·simangni alako  
Chinga re·angpilnajok  
Songtangchina da·alo.

368. "Pilak A·chik ripengko  
Chinga namen mittela,  
Gualjawa na·mangko  
Chasong agarrikchina."
369. Uandake bon·kame  
Kattarangko aganjok,  
A·chikrangko salam ka·e  
Me·gamrangde re·angjok.
370. Da·nang Me·gam Gonggrot-ba  
Balseng-ona re·bae –  
Mikchi ong·jok uaba  
Kattarangko agane.
371. Uni janggin' timiko  
Balseng unan on·piljok,  
Ekgrikani salamko  
Ka·e uko watatjok
372. Jokatako man·enba  
A·chikrangko miteljok,  
Da·nang Me·gam Gonggrot-ba  
Songtangchina re·angjok.
373. Re·angaha Gonggrot-ba  
Jinmarangko ja·rike –  
An·tang janggin' timiko  
Kang·kareo ganbite.
374. Uandake re·ange  
Dakgrikramko batangjok,  
Dingram Gitok A·doko  
U'mang mesal cha·angjok.
375. Mesal cha·man·ringmano  
Ta·makkuko ringaha –  
Rong·ma rongte kosako  
U'mang neng·taktokaha.

376. Unon Gonggrot saksantang  
Ong·onangjok chikolchi –  
Aue rona an·tangtang  
Rong·brak wari tu·achi.
377. An·tang janggin' timiko  
Rong·te 'sako donari,  
Aue rojok wario  
Me·gam Gonggrot nanagri.
378. Me·gamrangni kosako  
Rochakgipa rong·marang  
A·chikrangni sikkango  
Dangipasachim da·nang.
379. Rong·ma rong·te jinmako  
Dingram Gitok a·doko  
A·chikrangsa danaha  
Rompedapna bobilko.
380. Rong·ma rong·te kosako  
Rogipani saksade  
Ga·sikeke ga·akjok  
Da·nang Me·gam pantede.
381. Unon a·sel ong·aha  
Aiao namen kengini  
Rong·ma gimik dongjaha  
Ruruangjok unoni.
382. Rong·ma dandakgiparang  
Chikolchi ga·akangjok  
Rong·ma rompedapemung  
Mande sakdok sitokjok.
383. Unon Me·gam Gonggrot·ko  
Ga·akdapjok rong·marang,  
Aumitingo wario  
Da·nang an·tang saksantang.



384. Uni janggin' timiba  
Rong·te 'sako donara  
Rong·ma ga·akdapenba  
Kining ripik be·aha.
385. Nikravgija jo·ongrang  
Binekenba sitokjok,  
Janggi silchi donarang  
Uandaken bon·tokjok.
386. Me·gam Gonggrot bipaba  
Janggi·jama bon·aha,  
Rong·ma ga·akdapenba  
Sikko brete siaha.

\*\*\*\*\*

*Balsri gittim songo*

387. Me·gamrangni ja·mano  
Songchelani A·chikrang  
Songtangtangchi attamo  
Re·pilangjok uamang.
388. Hiho, hiho inchroe  
Jatna rasong on·angjok,  
Ruechinchin dakpile  
Songgipinni re·angjok.
389. Uamangni ja·mano  
Chi·indikdik dakaijok,  
Da·nang Balsri gittimo  
A·dingarang dongjajok.
390. Indioba Sonajing  
Aski ching·cheta gita-  
Dongrikenga Balseng·mung  
Salni demechik gita.

391. Indakesa manderang  
Ka·dimejok songtango  
Rasong man·e uamang  
Sonajing-mung Balseng-o.
392. Uamangko dakchakna  
Norindik-mung Doenang-  
Songo-noko ja·rikna  
Dongkuenga uamang.
393. Balsrigittim gimikon  
Uamangko niksengjok,  
Pilak songsongantion  
Mingsingako kinajok.
394. “Hai re·najok” inemung  
Sonajing-de Balseng-ko  
Uko jako salemung  
Rimengachim panteko.
395. Indioba watjajok  
Sonajing-ko panterang,  
Balseng-koba champengjok  
Da·nang songni nomilrang.
396. Da·nang Sonajing-koba  
Panterangan changduuljok,  
Rona gogai dokenba  
Ine u’ mang watjajok.
397. Pante-me·tran’ salrangko  
Gisik ra·na chanchie –  
Sonajing-ming Balseng-ko  
Rodilatna bon·kame.
398. Indakemung uamang  
Sonajing-mung Balseng-ko  
Songni me·tra-panterang  
Rodilatjok u’ mangko.

399. Gonda doke rodiljok  
Sonajing-ko panterang,  
Ka·pak ka·pak ring·diljok  
Panten' salko uamang.
400. Gogai doke rodiljok  
Balseng-kode nomilrang  
Ka·sariri ring·diljok  
Me·tran' salko uamang.
401. Doenang-ba panteba  
Nomil jinmarangmungsa –  
Rodilpajok biaba  
Kotip kadorekesa.
402. Norindik-ba ropajok  
Pante jinmarangmingsa –  
Gonda doke ring·pajok  
Be·en moringrengesa.
403. Uandake rodiljok  
Balseng-ma·angko uamang,  
Gogairangko dokdiljok  
Songni me·tra-panterang.
404. Chanchiate gisiko  
U'mang mikchi ga·akjok,  
Pante-me·tran' salrangko  
Ka·pak-ka·pak watatjok.
405. Nomil jinma Balseng-ko  
Mikchi ipakataha,  
Ka·dimean kattako  
Da·nang aganataha.
406. Sonajing-ni mikkangko  
Panterangba ka·sine  
Ipakatjok mikchiko  
Ka·sa-ka·sa agane.

407. Mikchi ipakgriktoke  
Ka·san' kusin' mikchiko-  
Da·nang salam ka·grike  
Watangaha u'mangko.
408. Ka·sa-ka·sa balbringbring  
Uamangko watangjok,  
Balseng aro Sonajing  
Jik-se ong·e re·angjok.
409. Ua songni nomilrang  
Ka·suangsuang dakrikjok,  
Da·nang pilak panterang  
Nirikmangmangarijok.

\*\*\*\*\*

*Ja·mano*

410. Songtangoni manderang  
Jripjrang dongrikaiaha,  
Bamchikkope uamang  
Da·nang agangrikjaha.
411. Unikode uamang  
Noktangtangchi re·angjok,  
Unomitingon da·nang  
Walba adi' waltingjok.
412. Uamangni ja·mano  
Songni sakgni me·chikma-  
Asongrikjok wal·timo  
Rongdotma-mung Dingrema.
413. Wal·tim chake uamang  
Agangrike roenga –  
Songtangoni me·chikrang  
Da·nang golpo ka·enga.

414. Katta agangrikako  
A·chik sulchi salenga,  
Sonajing-mung Balseng-ko  
Iandake ring·enga.

*Rong·dotma:*

415. “Aiao nanggo sarimo  
Gose da·nang Balseng-de  
Songnok dimdak gimiko  
Gisik seng·a pantede.

416. “Gun gisikko inoba  
Darang gipin sokjawa,  
Bilko jakko tonaba  
Songni pante dongjawa.

417. “Indakgipa panteko  
Man·paodeni chawari –  
Ong·pagenma gisiko  
Ang’ sari, mo kusini.”

*Dingrema:*

418. “Aiao na·aba sariba  
Maina pante Balseng-ko  
Agre rasong dakbea  
Angni de-saa nangako?”

*Rong·dotma:*

419. “Bebe chong·mot kattako  
Sari maina donnugen,  
Dakjaoba rasongko  
Agannade nangaigen.”

*Dingrema:*

420. “Indiode agangen  
Ang’ba mingsa kattako-  
Ang’ sarina parakgen  
Uamangni a·selko.”

*Rong·dotma:*

421. “Atcha sari indide  
Maia ua a·sela?  
Gipin dongja da·ode  
Aganpabo angnaba.”

*Dingrema:*

422. “Da·nang uni ortode  
Sonajing-ni ka·saasa-  
Balseng’ bilakanide  
Uni ka·saan’ bilchisa.”
423. “Ka·saani bilchisa  
Gisikrangko ching·ata –  
Gisik ching·a ginangsa  
Nama kamo cheata.”

*Rong·dotma:*

424. “Aiao da·nang sariba  
Angni desaa nangako –  
Agre rasong dakbea  
Nang’ namchik Sonajing-ko.”

*Dingrema:*

425. “Sari na·a an·tangba  
Angni desaa nangako –  
Rasong daka jokona  
Nang·ni gritang Balseng-ko.”

*Rong·dotma:*

426. Bang·a me·tra·panterang  
Chadikakon mikchara –  
Indakemung uamang  
Gitting-gittang ka·sara.
427. “Unikode ka·saachi  
Gisik mikandalata,  
Uni muni nangachi  
Jik-se jora ra·toka.
428. “Indakgipa ka·saade  
Ka·saani jojrangjrang –  
Mikchaani munide  
Gisik-katchi kolgranggrang.
429. “Ka·saani bimikde  
Ka·tong ning·o rangkogen  
Kim·kim ja·dil su·kame  
A·gilsakna balgaogen.”

*Dingrema:*

430. “Da·nang uni giminsa  
Nomilrangde cha·senga,  
Kam·cholonko nikesa  
Pante ka·sanapchenga.”

*Rong·dotma:*

431. “Cha·sengoba mitamrang  
Kam·cholonchi dakmika –  
Unomiting nomilrang  
Nama dake mesoka.”

*Dingrema:*

432. “Da·ororo indiba  
Panterangba dakmika –  
Nomil mikchachengjaoba  
Ka·saa dake mesoka.”

*Rong·dotma:*

433. “Name ja·delkujaon  
Pante a·rang-a·dangba –  
Nomil nama dakjokon  
Ka·sanapjok u’ mangba.”

*Dingrema:*

434. “Uni a·selba mingsa  
Donga ine intoka,  
Jawa mikchapajaesa  
Mikchachakna ga·aka.”

*Rong·dotma:*

435. “Unon jora ra·grike  
Jikse ong·a daktoka  
Ja·manosa talgrike  
Man·dik-man·si nidika.”

*Dingrema:*

436. “O·e nanggo bebemo  
Uandaken ong·ronga,  
Jikse ra·grikanio  
Bang·an ja·gitdotronga.”

*Rong·dotma:*

437. “Jikse ra·gualjaode  
Ka·saani pangkamgen,  
Umang’ nama kamrangchi  
Bate bate galchagen.”



438. "Sonajing-ni ka·sara  
Galchaataha Balseng-ko  
Balseng uni giminsa  
Chejok name kamrango."

*Dingrema:*

439. "Ong·chongmota uasa  
Sari nang·ko jejajok –  
Sonajing-ni ka·saasa  
A·gimiknan tikpajok."

*Rong·dotma:*

440. "Ka·saa susagrikosa  
Jiksen' kamrang nambatgen,  
Nokdang·ba·ku unosa  
Bate songnok silbatgen."

*Rong·dotma:*

441. "Indakgipa mandeni  
Ronggrikgipa ka·saade  
Siangoba janggini  
Dongrikkugen jagringde."

*Dingrema:*

442. "Ka·saani rokomrang  
Rokom dingtang bang·bea,  
Uko bang·a manderang  
Ma·sinade neng·bea."

*Rong·dotma:*

443. "Ka·saa dal·batgipade  
Jiksen' ka·saanisa  
Gipin ka·saanirangde  
Ong·a uanonisa."

*Dingrema:*

444. "Manderangde uako  
Ramram gita nikaia,  
Pante-me·tran' ka·saako  
Pagol-jonggol inaia."

*Rong·dotma:*

445. "Bang·a ramram manderang  
Uko dal·e ra·jawa,  
Gisik seng·pagiparang  
Ka·saan' kamo seng·jawa."

*Rong·dotma:*

446. "Uan donnugiminsa  
Dintangmancha a·sakna,  
Bebe-kaket kamchisa  
Parakatna mandena."

*Dingrema:*

447. "Ua donnugiminko  
Basak'bade parakgen  
Dal·begipa ka·saako  
Saoba kamchi mesokgen."

*Rong·dotma:*

448. "Ua saoba sawasa  
A·chikrangni gisepo,  
Donga baoni songosa  
Mungkinana a·sako?."

*Dingrema:*

449. "Aiao na·aba sariba  
Ua Sonajing-anba –  
Me·chik gun ginanggipa  
Nang·ni de-saa nanganba."

450. "Sonajing-ni gisikde  
Nama dingtangmanchasa,  
Uni ka·saan' gunrangde  
Ching·a a·gimiknasa."
451. "Patti-ra·rongipani  
Kasae watata gita –  
Jakma gitcam kamalni  
Dingtang daktea gita."
452. "Sonajing-ni kamrangko  
A·sak daksningchina,  
Uni nama gunrangko  
Chasong gisik ra·china."

*Rongdotma:*

453. "Minge sesoa gita  
Gisik matgrik pantena –  
Dingtang watata gita  
Uni chasong Balseng-na."
454. "Sonajing-mung Balseng-ko  
Ja·man ki·sang chasongde,  
Umang' ka·saan' gunrangko  
Neng·gen bebera·nade."

*Bon·kamao*

455. Rongdotma-mung Dingrema  
Uandake golpojok,  
Songni A·chik me·chikma  
Gisik katchirarajok.
456. Unon da·nang uamang  
Denggok choknokangaha,  
Wala jatchi batemung  
Tusichipangtokaha.

457. Denggokgrike wal·timo  
U'mang katta ring·jaha,  
Dandangrike janggilo  
Da·nang tusingaha.
458. Do·o paksa gisikon  
Walba seng·nasiaha,  
Salaramni ku·mangon  
Pringprang rongsa nabaaha.

\*\*\*\*\*

( Bon·aha )



**Published by Mrs. Sunilla G. Momin,  
Bonepa A·tilla, Tura**